



पुर्खा दय्क तकगु सम्पत्ति, भीगु कला व संस्कृति पिकाक-भक्तपुर नगरपालिका



स्वयं

नेपाल संवत् १९४१ चिल्लाश्वः / २०७७ चैत्र १ / 2021 Mar / ल्याः ३१, दाँः३



अन्तर नगर चेस धिं धिं बल्ला कासा व अन्तर विद्यालय धिं धिं बल्ला कासाया उलेज्या

वडा नं. ७ खय् त्वनय्गु नाःया फिल्टर व ट्याङ्की उलेज्या
(२०७७ फागुन २२ गते)



वडा वडाया सामाजिक सुरक्षा भत्ता इतः
(२०७७ फागुन १९ गते)



; DkfbSlo

@)&& r! , c^s %&, jif{#

देशं दुनय्या पर्यटन बल्लाकयगुलि बिच याय् मः

सन् २०२० ता नेपः या सरकारं पर्यटन वर्ष' घोषणा यासेलिं ख्वप नगरपालिकां उगु वर्षया लसताय'ख्वप महोत्सव' याय्गु खाँ क्वः छिता । हलिमय डांक कोरोना भ्वल्वय डाडः पुडः वसेलिं भ्रमण वर्ष व उगु महोत्सव दिक्ु याय् माल । थ्यं मथ्यं च्याला तक जूगु लकडाउनया इलय् देशं पिनय् याय्पुं (बाह्य) जक मखु देशं दुनयया (आन्तरिक) पर्यटक तनं वहे मव धःसां ज्यू । पर्यटन ब्यवसायख्य् लाय् तयो च्वंपुं अपलं मनूतय्गु लाय् नाख्य् दुथें दुनः । अपलं मनूतय्सं थःगु लजगाः हे हिड्कल । थुगु पर्यटन ब्यवसाय ख्य् लागु बाँमलागु लिच्वलं अर्थतन्त्रख्यनं धात्थें हे बाँमलागु लिच्व लाइगु हे जुल ।

भीगु जनजीवन अः बुलुहुँ भातिचा सानयँ काथं छिडः वगु दः । उकिं वांगु दाँय दिक्ु याड तयागु नखाचखात बुलुहुँ न्ह्याकः, मानेयाय्ता कुतः याडः च्वंगु दः । कोरोना भ्वल्वयया ग्याचव दहेमत जक धाय् मफूगु थुगु इलय् हकनं न्हपान्हपाया दिनय् थें थः यत्थें स्वतन्त्र जुयो ज्या इवः न्ह्याकय् धःसा छिनि मखुनि । स्वास्थ्य मापदण्डता पालना याडः पला छियमालिगु अवस्था अजनं दःनि ।

ख्वप दे सांस्कृतिक नगर जुगुलिं देशं दुनय् व देशं पिनय्या पर्यटकपुं बुलुहुँ चाह्य् वयो च्वंगु दः । लकडाउन व मेमेगु इलय् ख्वप नगरपालिकां पर्यटन केन्द्रित पूर्वाधार द्यकेगुलि बः ब्यू ब्यू वगु खः । उगु हे इलय् लोकं हवागु डातापोल्हें देगः ल्हवनय्गु, च्यासिंदेगः, चपालय् भैल द्यो थजगु सम्पदात ल्हवनय्गु व दानय्गु ज्या क्वचाय्कला । अपलं अपः सम्पदात ल्हवनय् -कानय् व दानय्गु ज्या चतारं हे याता व याडः नं च्वंगु दः । नपां थ्वहे फागुन २९ गते निसें चैत्र ३ गते तक जुइगु अन्तरनगर चेतया धिं धिं बल्ला कासा व अन्तर विद्यालय कासाया धिं धिं बल्ला कासा ख्वपदेशय् आन्तरिक पर्यटन अपलं वयकेता यागु छगू महत्वपूर्ण पला खः ।

हलिमयया अपलं देशय् कोभिड-१९ या ल्वय हकनं महामारी काथं पुडः, वाडः च्वंगु बुखाँ अः नं न्यनय् दःनि । नेपः देशय् चाह्य् वैपुं पर्यटक पिन्ता म्हवचाख्य् डान्हू तक होटल क्वारेन्टाइनय् च्वनय् मःगु मन्त्रालयया निपं (निर्णय) काथं अजनं देशं पिनय्या पर्यटकपुं लाहातय् निय जीकः जक वगु खानय् दः । अः देशं पिनय्या पर्यटकपुं मवगु इलय् स्थानीय तहतय्सं देशं दुनय्या पर्यटक विकासया निम्ति बः याय् मः ।

देशं दुनय्या पर्यटन अप्वय्केता न्हँ न्हँगु पर्यटकीय स्थलया बः चा हाकलं म्हासिइका पिब्वयो, उकियाता बांलाक, भिंक तयो स्यंः थाय् ल्हवडः, सुचुकुचुयाड, मः काथंया होटल,रेष्टुरेन्टत चाय्क, कासाया थी थी ज्या इवः त याडः पर्यावरणीय ल्याखं मः काथं मः थें ब्यवस्था याय्गु ई अः हे खः । गुगु ज्या मथां हे मयासें मगा ।

देशं पिनय् याय्पुं पर्यटकतय्गु जक भरय् च्वडः भी हज्याय् फैं मखु । भीगु सांस्कृतिक सम्पदात ल्यंकः म्वाकः तय्ता देशं दुनय्या पर्यटकतनं दुकाय्गु ज्या बल्लाकल धःसा भीगु पर्यटन ब्यवसाय नपां स्थानीय तहया आन्तरिक दुथा बल्लाई थुगु काथं मछिगु इलय् फुक्क स्थानीय तहतय्सं देशं दुनयया पर्यटन अप्वय्केता मः काथंया पूर्वाधार द्यकः सुधार याइगु आशा याय् फः ।

पिकाक-ख्वप नगरपालिका/सम्पादक-आशाकुमार चिकबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com



जातः प्वलय्गु व द्वपं वियगु गथे ?

नेमकिपाया नायो नारायणमान बिजुवर्छे

(थुगु च्वसु 'जनताको साहित्य र साहित्यकार' साफूतिं कायो भाय् हिलागु जुल । तस्कं नां जःम्हा, हानेबहम्हा प्रगतिशील च्वमि हरि बहादुर श्रेष्ठ (का. रोहित) जुं च्वयो द्यूगु उगु साफू न्हापांगु पिथना वि.सं २०३८ भाद्र महिनाय् जनलेखक संघ पाखं, नेकगु पिथना सन १९७६ भाद्र महिनाय् जनताको साहित्य प्रकाशन बागमती अञ्चल पाखं व स्वकगु वि.सं. २०५८ जेष्ठ महिनाय् नेपाल क्रान्तिकारी महिला संघ ख्वप पाखं पिथांगु खः । जनताया साहित्यकार जुइपिन्ता छगू लांपु क्यनय्गु काथंया थुगु साफूया मू थौं नं उलिहे च्वय्ला । समसामयिक विषयसं दसु नपां बियो च्वयो द्यूगु थुगु साफूया च्वसु त अपलं प्रगतिशील च्वमि पिसं थौं नं उलिहे ज्वः मदुगु काथं डाल वयो च्वंगु दः । वहे खाँयाता बिचः याड साहित्यया उर्वर ई थुगु महिनासिं न्ह्याइगुलिं छु च्वय् ? गय् च्वय् ? दक अलमल जुयो च्वपुं च्वमिपिन्ता ग्वाहाली जुइगु मतिं थुगु च्वसु पिब्वयागु जुल-सं)

साहित्यया मू आजु हे समाज या जनताया दै दक्व खाँतय्गु जात प्वलय्गु खः जक धाइ पुं दः । अमिसं थव फुक्क धात्थें खाडागु यथार्थवादी साहित्यया नामं याय्ता स्वई । अलय् धात्थेंगु खाँ धःसा अथे मखु । भीगु साहित्यया मू उद्देश्य सामन्तवाद व उपनिवेशवाद विरोधी संघर्षख्य ज्या साड नैपुं ज्यापु ज्यामितय्ता राजनैतिक रुपं सचेत याडः अमिता थाकाय्ता ग्वाहाली याय्गु खः । मेकाथं धाय्गु खःसा क्रान्तिता ग्वाहाली याय्गु हे साहित्यया उद्देश्य जुयमः । क्रान्तिं जनताया सेवा

याई । अथे जूगुलिं साहित्यया उद्देश्य हे क्रान्ति व जनताया सेवा याय्गु जुई ।


धात्थें जात प्वलय्गु जक साहित्यया उद्देश्य खः दक जूसा थुकिं समाजता नोक्सान नं याई । गथेकि -नेम्हाप्यम्हा बजारिया च्वमितय्सं यथार्थताया नामय् मिसामचा वा मिजं मचा वा नेम्हा तेपुया घच्यापुगु व फोहरी खाँत नपां गथे खः अथेहे बयान याड च्वई । अलय् घच्यापुगु खाँ हे भन लिसा लिसा कायो च्वई । बुट्टा कियो, बयान याड च्वई । थजगु साहित्यं समाजय् गजगु लिचव लाई ? पक्का हे खानय् द, अजगु साहित्यं समाजता क्रान्ति व राजनीति खय् मखु मिसामिजंया फोहरी खाँ जक मति वांकः बिई । समाजय् सोभा-सिधापुं जनता नं दः । अपुं च्वय् बाकी गु खाली पाना भवें थें जुई, फोटो खिचय् याय् बाकीगु रिल (फिलिम) थें जुई । अमिसं छु ब्वना वा स्वता अजगु हे लिचव अमिकय् लाई । विशेष याडः ल्यासे-ल्याम्होपिन्ता मथां हे थुकिया लिचवःलाई । थी थी ढङ्गया फोहरगु मतिना व जासुसी साहित्य व संकिपां अपलं मिसामचा व मिजंमचापिन्ता बामलागु लिचव लागु खानय् दः । खुँ-डाँका व स्याय्-पालय्या हत्या-हिंसाया साहित्य व संकिपां समाजय् अपराध भन अपः जुई । साहित्यं समाजया जात प्वलय्गुया अर्थ थव मखु थथे खःगु खाँ धायो च्वयोतःगु अजगु साहित्य बाँमलागु लिचवः लाइगु अजगु साहित्यया विरोध व कुंखिय्गु ज्या याय्मः । थौं शोषक व पुँजीपति वर्ग, वर्ग संघर्ष व क्रान्ति जनताया ध्यान मवांकय्ता थजगु फोहरी साहित्यया प्रचार-प्रसार याड च्वंगु दः । थुकिं जनताया क्रान्तिकारी भावनाता बुलुक बिइ, छ्युकः बिई । अथेजूगुलि थजगु खः खः गु खाँ धायो च्वइगु यथार्थवादी साहित्यता भीसं फोहरी साहित्य धाई । भीसं थजगु साहित्यता यो ताय्के मज्यू । किसान-मजदुरयापालिड च्वइपिसं

डयन्हयगूगु स्वप पौ, बःछि पौ(पाक्षिक)

साहित्यकारपिसं समाजता कुंखियगुया अर्थ धःसा थथे मखु ।

समाजय् शोषक सामन्त व पुँजीपति तय्सं जनताता शोषण याई । गुलिनं नेता जक जूपुं शोषक तय्गु हे पा लिई । विदेशी ब्यापारी व उद्योगपतितय्सं भ्नीगु देशय् तस्कं थिकय् याड मालसामान मियो यक्व यक्व लब नई । दांकः कच्चा सामान यंकी । विदेशी एकलौटी पुँजी खं नेपःया फुक्क आर्थिक जीवन हे थःगु लाहातय् लाकय्गु स्वई । देशया गुलिं साहु-महाजन, ब्यापारी (बञ्ज) ब्वड तःपुं मनुत विदेशी पुँजीयाय् हे पा लिड नुवाई । थव बांलागु मखु । साहित्यकारसपिसं उपन्यास, बाखा, काव्य, चवसु व प्याखंत चवयो अमिगु सुचुक सुचुक खुयो याड तःगु फुक्क ज्यातय्गु जात प्वलः जनताया हःनय् काड बियमः । थुकिता मेगु भासं अमिता जनताया हनय् नांगे याय्गु नं धाई । अथे धाय्गु अमिगु आन्द्राभुरी ल्हवयो क्यनय्गु नं धाई । थथे याड क्यनय् फःसा जनतां खाँ थुई, जनताया चेतना थाजाई । अलय् देशभक्तिया भावना ब्वलानि । विदेशी शोषक तय्गु पा लिडपुं ब्वड तःपुं मनुत व नेतात धःपुं नं जनतां म्हासिई । जनताया उपनिवेशवादया विरोधी संघर्षता नं ग्वाहाली याई ।

जनताया मचः मगागु (खोट) छाय्, गथे क्यनय्गु ?



ज्या साड नैपुं ज्यापु-ज्यामित देशया अपलं दःपुं (बहुसंख्यक) जनता खः । अमिगु हिचःति देशय् अन्न सय्की, माल सामान दय्की । अमिगु हे मेहनतं कल-कारखाना स्कूल, कलेज छँ दानय्गु अफिसत दानय्गु ज्या न्हयाई । साफू छापय् याई । चवसा (कलम) नं अमिसं हे दय्की । अथेनं जुगौं जुगानिसं अमिगु हिचति खय् पुँजी पति तय्सं मोज याड च्वनि । अमिसं आखः ब्वँ वानय्गु वा आखः ब्वंकय् फैमखु, अलय् मौका नं दै मखु । अथे जूगुलि अमिसं थःगु सांस्कृतिक स्तर थाकाय् मफःनि । अमिकय् भूगोलया ज्ञान मरु, विज्ञान बांलाक थुइमखु, इतिहास व मेमेगु समाज शास्त्र ब्वनय् खानीमखु । देश विदेशया सफल व असफल क्रान्तिया बारे ब्यवस्थित अध्ययन याय्गु मौका नं दैमखु । थथेयाड अमिगु सांस्कृतिक स्तरता सामन्तवाद व उपनिवेशवादं थाकाय्गु स्वै मखु । न्ह्याबलें गालय् क्वफवाड तय्गु स्वई ।

अथेनं छगू खाँ अमिसं नं स्यू । व छु खः ? अमिसं स्यूकी देश व विदेशया शोषकतय्सं अमिता नं हि त्वड च्वंगु दः । म्हवँ जक ज्याला बी, थःगु मेहनतया भाग लुटेयाड कःगु दः, माल सामान अपलं मू तयो मियगु ज्या याई । थव अमिसं थःगु हे अनुभवं स्यूगु खः। अलय् थव गथे जुला अलय् थुकिया हाँग निसें ल्यं थानय्दै दक सुरुखय् अमिसंथुइ मखु । लिपा-लिपा मेमेगु देशया मजदुर व किसान तय्गु आन्दोलन या त्या-बु खं अमिसं न्हँ न्हँगु खाँ थुइकी, ज्ञान काई । ज्ञान कायो नं च्वंगु दः । थव खाँ अमिसं थःगु संगठनपाखं व संघर्ष थुइकी । अथे नं राजसत्ता लाहातय् काय्गु संघर्षया थकय् प्रत्यक्ष अनुभव मरुगुलिं अपलं कमजोरी व मगाःमच(खोट) अमिकय् दै । अथे जुगुलिं भ्नीसं थव फुक्कं मगाःमचः व मभियाता सांस्कृतिक स्तर मथूगु जक धाय् । थुथाकय् लाक जनताया साहित्यकार पिसं बिचः याय् मः ।

ज्या याड नैपुं ज्यापु-ज्यामित नं सामन्ति व पुँजीवादी समाजया किचा (उपज) थें जूगुलिं थुगु समाजया खराबी खं अमिता नं लिचव लाकि । न्हँपां न्हँपां अमिसं शोषणया विरुद्धय संघर्ष याय सै मखु । शोषणता भागयं जूगु दक भःपियो जुई । न्हँगु ढड्गं संगठन याय् नं सैमखु । ब्यक्तिगत व चिच्या-चिच्याहांगु स्थानीय संघर्षत अजगु हे चिच्या-चिच्याहांगु खाँखय् याड च्वनि । संगठन व संघर्षया अनुभव मरुगुलिं अजगु संघर्ष बीचय् हे न्ह्यो छुवै वा त्या हे त्यासां उलि फाइदा जुइमखु । लिपाथ्यंक ल्वाड च्वनय्गु भावना दैमखु । सैद्धान्तिक स्तर च्वजाइ मखु । संगठन फ्यासुइ, थः थः या भाइचारा थजगु

जुई । अमिता हछ्याइपुं न्हयलुवा जुइपुं पासापुंनं अनुभवी व पाकोपुं जुई मखु । अः छु थुथाक्य लाक साहित्यकारपिसं जनतात ज्या लगय् मजु धायो अमिगु मगा, मचः धायो जात प्वलय्गु ला? अमिगु फ्यासुगु संगठन व न्हयलुवा पिनिगु विरोध व कुंखियगु खः ला ? मखु, थुथाक्य लाक साहित्यं जनताया सेवा याय्मःगु खः । गथे? जनताता अमिगु मचः मगागु खाँ थुइक बियमः कमि कमजोरीत ल्हवड भिंक्य बियो त्याक्य बियता ग्वाहाली याय्मः कतः क्वत्यक्य च्वनिबलय् व बुकः च्वनिबलय् क्वतुइगु मन, मनय् वैगु निराशा व जुइगु दुःख तांक न्हूंगु जोश व बल थाकाय्केगुलि ग्वाहाली याय्मः ।

हकनं न्हयसः दानय्फः, गथे ? धाय् छम्हा बाखं च्वमिं छगू गांया किसान संघर्षया बाखं च्वई । नेम्हाप्यम्हा किसानत जक संघर्ष याय्ता हज्याई , मेपुं वयला मवयला दक दश्वी लाडः च्वनि । संघर्षखय् किसानत बुइ थे. बुइथे च्वनि । अथे धाय्गु अमिसं बाली लयो छँ ह्य् फैमखु अलय् शोषकपिसं लुटेयाड यंकी । छम्हा नेम्हा पासापिन्ता पुलिसं ज्वड यंकी अलय् शोषक व जाली फटाहापिन्ता हाकं ई कः, टिन थाड गामय् चाहिक्य मखान । अलय् शोषक पक्ष बल्लागुलिं मुख्यम्हा शोषक विसे वान किसानत छपला लिचिली, बुइ अलय् निराश जुय फः । श्व धात्थेगु घटना खः । च्वमि नं थुथाय् लाक बाखा क्वचाय्की मखु । वं थःगु बाखनय् किसान तय्गु हकनं बैठक सतक्य बी । बैठकय् थःगु मचः मगाः व कमजोरीत क्यडबी । मेगु गामय्या किसानतय्ता नं इलय् हे खबर थयंक्य मफूगु वा लिपालाक वगुलिं अथे जूगु खाँ काड बी । पासापुं थयंकः मव बलय् हे ज्या इवः न्ह्याक गुलिं थः कमजोर जूगु खाँ खं न्हयलं चाय्की । न्हपालाक थाय् थासय् किसान संगठनया थःपुं मनूत छ्वय् मफःगु वा तय् मफगुलिं शत्रु बिस्सु वांगु खाँ थुइकी अनेक-अनेक । थथे थमनं याडागु ज्या खय् मचः मगागु खाँ थुलकीं हकनं संघर्ष खय् हज्याई । अः न्हपायाय्गु मचः मगागु कमजोरी याइ मखु । न्हपा स्वयो किसान कार्यकर्ता अपलं होसयाड पला तै । थुथाक्यलाक साहित्यकारपिसं जनताया कमजोरी व मचः मगागु ज्यात मयाकसें क्यड बियो ग्वाहाली याय्मः । गुकिं क्रान्ति हछ्याय्ता छगः गोलीया ज्या याई । थुकिता हे साहित्यं जनताया सेवा यागु धाई ।

अथेहे मेम्हा साहित्यकार पासां शोषकपिनिगु सभाया बयान याई । अमिगु दश्वी शोषण व लबः या नितिं देदेताड हानथापयाई, लुतुलुई, जःजि ग्वई । देश व जनताया हि त्वनिगु न्हूँ न्हूंगु जःप्यनय्गु खाँ जुइ, षडयन्त्रत ग्वयो हई । जनतां आना

हे विरोधया सः श्वय्की । शोसक तय्ता ब्वासाई । च्वमिं थुथाक्यलाक शोषकतय्ता तस्कं क्वहय्की । अमिगु स्वार्थया आन्द्राभुरी ल्हवयो क्यनि । गुकीं जनताया मनय् शोषक तय्ता घृणा याई नपां अमिगु दश्वीया मिलय् मज्जुगु खाँ थुइकेता नं ग्वाहाली याई । गुकीं शोषकतय् मन ग्याई अले बः मलाड वानि । हकनं च्वमिं शोषकपिनिगु बैठकय् विरोध याक्य बिइबलय् किसान कार्यकर्तापिनिगु बहादुरीया गुणगान याई । किसान जनतात छप्पा छधिं जूगु व अमिसं यागु चाँजोपाँजोया बयान याई । किसान जनतात छप्पा छधिं जूगु व संगठनया जयजयकार याई । थुकिं किसानतय्गु थः मनं याडागु शोषण विरोधी संघर्षखय् विश्वास अप्वई । अमिक्य दःगु ग्याचिकु पहः मदय्क साहसी याय्ता ग्वाहाली याई । जनताया समर्थन व तारिफ याय्गु ज्याखय् व शत्रुतय्गु कुं खियगु व विरोध याय्गु ज्याखय् साहित्यकारपिसं गुळें गुळें यथार्थताया क्वेँ खय् आदर्शया हि, ला व छेँगु भुड बिय मालय् यो । अथे धाय्गु यथार्थताया तस्बीरे छगू नेगु बुट्टा ताड बिय मालय् यो । सिन्ह तिक बिय्गु थें । थथेयाड साहित्यकार पिसं थः क्य दःगु फुक्क कलाता छ्यलः किसान जनताया सेवा याई अलय् क्रान्तिया तुइजला ताः ताः पाक यंक बि ।

थुकिता अखः धात्थे च्वमिं यथार्थताया नामय् किसानतय्गु संघर्षता अशिक्षितपिनिगु असंगठित विरोधया सः व काचिगु हमला दक च्वत धःसा उकिया अर्थ खः विरोध । थुकिं जनताता थःगु मचः मगा चिइकय्ता ग्वाहाली याइ मखु । थुकिं वर्ग शत्रुता ग्वाहालीयाई अलय् अपुं लय्ताई । अथेहे शोषक तय्गु सभाता सुसंस्कृत, व्यवस्थित व औपचारिकतां जःगु दक छाय्प्यसा उकिया अर्थ खः शोषक वर्गता थाकायो अपुं नेखय् मध्ये छखय् लिय हे मः । थुथाक्य छु मिखालं स्वय्गु धाय्गु खाँ दकलय् महत्वपूर्ण जू वई । शोषक वर्गीय दृष्टिकोण दःपुं साहित्यकारपिन्ता किसान-मजदुर व जनताया पक्ष च्वय्ता थाकुई । च्वहे च्वसां उकि अपलं मनय् वथे च्वगु बनावटी जक जुई, गुळेतक वं थःगु मनता ज्या साड नैपुं कामदारवर्गया पा लिड च्वइ मखु, अथे धाय्गु थःता छ्यलिमखु उळेतक वाय्गु च्वसु खय् छतिं हे जःति दैमखु, अलय् सास मरुगु लास थें जक जुई । अथेहे सर्वहारा दृष्टिकोण दःपुं साहित्यकार पिसं शोषक वर्गता च्व छायो च्वसा न्ह्याक्य फै मखु, वयागु मनं हे अजगु ज्या याय् मं दैमखु । अलय् सुं साहित्यकारं थःगु मनं निसें हे शोषक वर्गया पक्षखय् च्वइ व सर्वहारा वर्ग व जनताया साहित्यकार जुय फै मखु ।

खप विद्यालयया लागि संघर्ष याडः च्वंगु दः

• माननीय प्रेम सुवाल

खप नगरपालिका पाखं न्ह्याक च्वंगु सर्वसाधारण जनताया काय् म्हाया पित्ता उच्च शिक्षा ब्वनय्गु मौका बियो च्वंगु खप मा.वि., खप कलेज, शारदा क्याम्पस, मा.वि. या निस्वाना दिवसया लसताय् थुगु शैक्षिक संस्था तय्सं देश व जनताया इमान्दारीपूर्वक सेवा याडपुं ब्वनामिपुं ब्वलांकय्गु ज्या खय् अजनं सफल जुय फय्मः दक भित्तुना देछायो च्वडा । नेपाल मजदुर किसान पार्टी विद्यालय शिक्षा निःशुल्क व अनिवार्य व विश्वविद्यालय शिक्षा निःशुल्क जुइगु व्यवस्था ह्यता संघर्ष याड च्वंगु दः । कम्युनिष्टतय्सं शिक्षा व स्वास्थ्य निःशुल्क, थःगु हे देशय् ज्या, उत्पादनया मुख्य मुख्य साधन व सेवा सामाजिकीकरण, शोषण मद्दय्केता संघर्ष याई । अथेनं नेपालय् थःता कम्युनिष्ट धाइपुं तःकहे सरकारय् वान । अःनं सरकारय् च्वड च्वंगु दः अथेनं देश व जनताया भिं जुइगु ज्या मया ।

कोभिड भ्वल्वय हलिमय ब्याक डाडः पुडः वांगु कारणं १२ लाख नेपःमि पुं गरिबी रेखामुनि क्वहँ वांगु सरकारी तथ्याङ्क दः । श्वनं हाँ हे ६० लाख नेपःमिपुं गरिबी रेखामुनि दःगु खाँ सरकारी तथ्याङ्क क्यड च्वंगु दः । धात्थे खय्क नेपः देशय् गरिबीया ल्या सरकारी ल्या स्वयो यक्व हे दः । ८० लाख नेपःमि पुं ज्या मः वानय्गु नामयँ ११० गू स्वयो अपः देशय् बहुराष्ट्रिय कम्पनिया दांपुं ज्यामि जुयगुलि बाध्य जुयो च्वंगु दः । धात्थेगु ल्या धःसा श्वस्वयो अपः दः ।

उद्यदा थुख्य जलाखाला दे चीनय् ८० करोड जनसंख्या ता गरिबी पाखं मुक्त यातसा ८३२ गू नगर व १ लाख व नेद्रगू गां न्ह्याब्लेंया लागिं गरिबीं च्वन्ह्याकः थाकाल । नेपः देशय् नं प्रजातन्त्र वगु ७१ दा दत अथेनं पित्याया हुनिं भ्वछिं हे आत्महत्या याय् मःगु बुखाँत प्याहाँ वयो च्वंगु दः । चीनया १८ प्रतिशत गामय् फोरजि इन्टरनेट सेवा बियो च्वंगु दः अलय् भ्कीगु देशया गां गामय् मोबाइलया नेटवर्क तक बांलागु ब्यवस्था मरु ।

चीनया छगू धापु दः- छम्हा मनूता डा बिल धःसा वयागु छन्ह्या पित्या तानि अलय् डालायगु स्पंसा सदांया पित्या तानी । चीनय् कृषि अनुदान बजेट दाच्छीया नेगू खर्ब डलर थ्यन । भारतय् थजगु अनुदान बजेट ११ अर्ब डलर व सं.रा. अमेरिकाय् ४८ अरब डलर जक दता । अः नकतिनी चिनियाँ कम्युनिष्ट पार्टीया महासचिव नपां चीनया राष्ट्रपति सी चिन फिङ जुं चीनय् गरिबी न्हांक छ्वयागु (उन्मूलन) घोषणा याड



दिल ।

विकासया लाँपुइ चीन नपां मेगु जलाखालाया दे भारत उथिं ग्यंक लाड स्वय फँ मखु । भारतय् बच्छी मयाकं जनतात छछाक जक नयो देनय् मःगु व खुल्ला शौचालय वानय् मगु अवस्था दः । विकास गथे याय्गु धाय्गु नेपालं चीन पाखं सय्के मः । नेपः देशय् अः तकया सरकारत गति मलागुलिं नेपः मि पिनिगु कपालय् १६ खर्ब तका दां ऋण तयो बिल । थव भन अप्वयो वाड च्वंगु दः ।

ल्याटिन भाषाय् 'मिनिस्टर' या अर्थ नोकर(च्यो) खःसा प्राइमिनिस्टरया अर्थ मूलम्हा (प्रमुख) नोकर (च्यो) खः । अलय् नेपालय् प्रधान मन्त्री व मन्त्रीजुपुं थःता जनताया मालिक भः पिई । सत्ताधारी पार्टी नेकपाया विवाद नं मालिक जुयगु विषयलय् जूगु खः । भागवण्डा मिलय् मज्यूयो ल्वापु थैगु ज्या सरकारय् वापुं फुक्क पार्टीकय् खानय् दः ।

पुँजीवादी पार्टीख्य भागवण्डाया ल्वापु गुब्लें प्वनिमखु । नेकपा दुनय्या सत्ताया 'खिचा ल्वाथें ल्वागु ल्वापु' या कारणं वांगु पुस छ गते प्रतिनिधिसभा विघटन यागु खः । थः गु हे पार्टीया नेतातय्गु बलं ज्या सानय् मफूगु स्थिति थेंगु सरकारं संसद विघटन याइगु स्वाभाविक खः । अलय् नेपः या भूमि लिम्पियाधुरा, कालापानी, लिपुलेकय् नेपःया दाबी त्वःतिपुं व संसदं एमसीसी पारित याकेगु सर्तय् भारतीय शासक वर्गया स्वार्थ काथं श्वहे फागुन ११ गते सर्वोच्च अदालतं प्रतिनिधि सभा पुनः स्थापना याता । श्वकिं देशघाती ज्या जुइगु पक्का खः ।

डयन्हयगूगु स्वप पौ, बःखि पौ(पाक्षिक)

सन् १८१६ या सुगौली सन्धी काथं लिम्पियाधुरा नेपःया भूमिखय् लाःसा महाकाली खुसी पश्चिमपाखे जक भारतय् लाः । हिन्द प्रशान्त क्षेत्रय् अमेरिकी नेतृत्वया सैन्य गठबन्धन, एमसीसी सम्झौता भारत नपां मिलय् जुयो चीनया बिरुद्धय दक्षिण एशियाय् युद्ध याकेगु कुतःखः । अथे जूगुलिं नेपाली जनता एमसीसी सम्झौता खारेजीया लागिं सडक संघर्ष याड च्वंगु दः । नेकपाया छम्हा नायो पुष्पकमल दाहालं प्रतिनिधिसभा पुनः स्थापनाया लागिं नेपःया नितिं भारतीय पूर्व राजदूत श्यामशरण नपां फोनवार्ता यागु नं सार्वजनिक जुल । थुगु फोनवार्ता सत्य खःसा वनं हकनं छगू देशघाती पला जुई ।

प्रतिनिधिसभा विघटन संविधानया व्यवस्थाया अखः जूगु दाबी याड च्वंगु दः । संविधानय् च्वयो तः काथं जक देशय् घटना जुइ मखु । प्रतिनिधिसभा विघटन व निर्वाचन घोषणा राजनीतिक घटना खः । निर्वाचन जनताता शिक्षित व सचेत याय्गु तहांगु राजनीतिक अभियान नं खः । प्रतिनिधिसभा पुनः स्थापना जुसेलिं निर्वाचन पाखं करौडौं नेपः मि पिन्ता शिक्षित व सचेत याय्गु बृहत राजनीतिक अवसर मत ।

चुनाव याय मःसा अरबौं धेबा खर्च जुइगु दाबी नं याता । निर्वाचन, घोषणा-पत्रया ल्वापु खः । धेबा व सामानत इडः भ्वेँ नकः निर्वाचन त्याकिपुं पार्टी व उमेदरबारत नैतिकता मरुपुं खः । अथेहे निर्वाचनया बहुमत दय्कः सरकारय् वाडः भ्रष्टाचार याय्गुनं देश व जनताता विश्वासघाट याय्गु खः बेइमानी खः ।

एमाले-माओवादीया मंकः पुच(संयुक्त मोर्चा) थ्यं मथ्यं दुईतिहाइ थासय् त्याकला । मंकः सरकार दय्क नपां नेगुपार्टी मिलय् याड नेकपा गठन यागु थजगु घटनाता देशय् तहांगु ह्युपा (कायापलट) हे जुइगु बयबय याता । धात्थे धाय्गु खःसा व नेगू घटना सिद्धान्त नपां ज्वः मला, मिलयमजु । सिद्धान्तया लिधंसाय मजगु अथेधाय्गु भागवण्डाया नितिं जूगु एमाले व माओवादीया चुनावी मोर्चा मंकः सरकार व पार्टी एकता बारे नेमकिपा छुं हे भ्रमय च्वंगु मरु । अथे जूगुलिं नेपाल मजदुर किसान पार्टी प्रतिनिधिसभा विघटन स्वाभाविक धायो वगु खः ।

कानुन विषयया विद्यार्थी पिसं 'महिला हिंसा' या विरुद्ध क्यंगु छधाः प्याखं इलं हवागु व सान्दर्भिक जू । बलात्कार हत्या थजगु महिला हिंसाया गम्भीर अपराधीत व तः तः हांपुं भ्रष्टाचारीपिन्ता संविधान संशोधन याडः मृत्युदण्ड विय दैगु कानुन दय्के मः । गुकिया सः नेमकिपां श्वकः वयो च्वंगु खः । अथेनं सरकारय् वांगु पार्टीत थुखय् पाखय् ध्यान तयो च्वंगु मरु ।

माओवादीया हिदातकया द्वन्द्या इलय् भारत नपांया

खुला सीमाय् तयो तःपुं नेपःया सुरक्षाकःमिया चौकी आक्रमण याड अमिता बिसिकय् छ्वता । गुकिं याड भारतीय विस्तारवादता नेपःया भूमि अतिक्रमण याड लाँ व मेमेगु पूर्वाधार दय्केता अपुत । माओवादीया छ्याचक्क्यडः नेपः या अधिकारी पिसं भारतय् हे च्वड नेपाल भारतस्ट्रिप(सीमा) नक्सानं दय्कला । श्व नक्सा मानय् याय्गु खःसा नेपःया हजारौं विघा बुँ भारतय् लः वानि । कञ्चनपुर जिल्लाय नहर, ढवनय्कुथि व मेमेगु संरचना भारतय् लः वांगुलिं स्थानीय जनतां प्रतिनिधिसभाया राज्य व्यवस्था व सुशासन समिति उजुरी नपां बिला । सरकारय् वांगु दलयाय्पिसं नेपःया जग्गा अतिक्रमण जुइगु याडः दय्कगु (स्ट्रिप) सीमा नक्सा खारेज याड न्हँगु नक्सा दय्केगु आँट मया । नेमकिपां थुगु नक्सा खारेज याकेता सडक व संसदय् संघर्ष याड च्वंगु दः ।

खवप विश्व विद्यालयया विधेयक पारित जुगु जूसा सर्वसाधारण जनताया काय् म्हयाय् पिन्ता १०-१५ लाख तका दांमं डाक्टर ढवंकय् दैगु खः । अः इञ्जिनियरिड कलेजय ढवनामिपुं भर्ना कायो च्वंगु दः । विश्व विद्यालयया प्रवेश परीक्षाया लिचवकाथं योग्यता क्रमया लिधंसाय् भर्ना याइगु खः । सरकारं खवप नगरपालिकाया इञ्जिनियरिड कलेजतय्ता थप समूह व विषय ढवंकय्गु अनुमति ब्यूगु जूःसा सर्वसाधारण जनताया अपलं मस्तय्ता इञ्जिनियर ढवनय्गु हवता चू लाइगु खः । सरकारं निजी कलेजता अःपुक सम्बन्धन बियो च्वंगु दः । अलय् खवप नगरपालिकाता बियो च्वंगु मरु । अथे जूगुलिं नेपालय् राणाशासन अन्त्य जुल अथेनं पहः व बानी मतांनी । उकिहे जनताया संघर्ष न्ह्याडं तुं च्वंगु खः ।

(नेमकिपाया सांसद प्रेम सुवाल जुं खवप नगरपालिका पाखं न्ह्याक च्वंगु शैक्षिक संस्थात निस्वाना दिवसया लसताय २०७७ फागुन १४ गते बियो द्यूगु न्वचु)



महिला हिंसा विरुद्धया छधाः प्याखं

सामुदायिक ब्वनय्कुथि भिंकय्ता निजी ब्वनय्कुथिता जिम्मा वियगु धाय्गु राज्यया गैर जिम्मेवारी

• प्रमुख प्रजापति

दांकः भिंकः व बांलाक शिक्षा बियगु नपां नीछ्गू शदिया लागिं योग्य पुं नागरिक ब्वलांकय्गु उद्देश्यं थौं स्वयो नीदा हॉ ख्वप मा.वि. निस्वांगु व उकिं लिपा ख्वप कलेज नपां नेगू इञ्जिनियरिङ्ग कलेज नपां खुगू कलेज याड न्हय्गु शैक्षिक संस्थात ख्वप नगरपालिकां न्ह्याकः वयो च्वंगु दः । नीदातकयाड वगु कुतः खं व फुक्क शैक्षिक संस्थात देशयाय हे (उत्कृष्ट) तस्कं च्व जःगु शैक्षिक संस्था काथं धस्वाड च्वनय् फता । देशां देछियाय थ्यं मथ्यं खुद्र स्वयो अपः ब्वनामिपुं ब्वडः च्वंगु उगु शैक्षिक संस्थात स्थानीय तहं न्ह्याकः तःगु नेपःयाय हे न्हापांगु शैक्षिक संस्थात खः ।

देशय् आर्थिक उदारीकरण नीति लागु यासेलिं निजी ब्वनय् कुथित व कलेजत अपलं अपः चाय्कः हल । सरकारया पूर्णस्वामित्वः खय् न्हूंगु ब्वनय् कुथि, कलेज व विश्वविद्यालयत चाय्केगु ज्या खापा तिय्थे हे तिड छ्वता । शिक्षा धाय्गु सार्वजनिक सेवाकाथं काय्मःगुलि सरकारं थमनं हे निजी न्याय मिय याय्गु वस्तु थें यायां यंकला । तस्कं थिकय् थिकय्गु ब्वनय्कुथि व कलेजय् गरिब जनताया काय् म्हायायपिसं ब्वंकय् फौगु मखु । प्रतिस्पर्धी निजी संस्थाया हनय् सामुदायिक शैक्षिक संस्थात भन भन लिनय् लालां वान । बुलुहुं सर्वसाधारण मनूतय्कय् नं सामुदायिक शैक्षिक संस्थात बाँमलागु मनय् वान । अलय् गुलिं गरिबपिनि काय्म्हयाय पुं नं थः मस्तय्गु भविष्य बांलाकय् धाय्गु मतिं मफू मफू अनेक दुःख कष्ट नयो निजी शैक्षिक संस्थाय् ब्वंकय्गु संस्कार ब्वलाड वान । ख्वप गरपालिका पाखं न्ह्याकः च्वंगु शैक्षिक संस्थां तस्कं बांलागु उत्कृष्ट नतिजा पिब्वयो च्वंगु दः । स्थानीय जनता, जनप्रतिनिधि, ब्यवस्थापन समिति शिक्षक, प्राध्यापक, अभिभावक व ब्वनामि विद्यार्थीपुं सकल सिया मंकः कुतलं थये बांलागु लिच्वः हय फगु खः ।

अः सरकारय् च्वड च्वंगु राजनैतिक दलं निर्वाचन घोषणा-पत्रखय् शिक्षाया नितिं मुकं बजेटया २० प्रतिशततक (विनियोजन) छखय् ली कय्गु धःगु खः । निर्वाचन लिपा दयकगु दुई तिहाइया सरकारं निर्वाचन घोषणा पत्रता लुमांकः शिक्षाया



लागिं दायँ दायँसं बजेट म्हवँ यायां यंक च्वंगु दः । चालु आ.व.२०७७/७८ य् थ्वं मथ्यं १० प्रतिशत जक थ्यंकगु दः । व नपां राज्य शिक्षाया महत्वपूर्ण जिम्मेवारी छखेलिड वाड च्वंगु दः । सामुदायिक विद्यालय ल्हवनय्गु (सुधार) या जिम्मा निजी विद्यालयता ब्यगु छगू दसु भूगु हःनय् दः । थुगु आर्थिक वर्षया बजेटय् संस्थागत विद्यालयता सामाजिक उत्तरदायित्व पू वांकय्ता छगू सामुदायिक विद्यालयया शैक्षिक पूर्वाधार सामग्रीनपां शैक्षिक गुणस्तर थाकाय्गु जिम्मा वियगु नीति घोषणा याता । थ्व संघ सरकारया गैर-जिम्मेवारी व लज्याचाय्पुगु ज्या खः । ब्यवहारं थ्व शैक्षिक माफिया पिनिगु स्वार्थं जःगु ज्या खः दक अनुमान याय् छिं ।

नेपः याः संविधानय् मा.वि. तगिंतक निःशुल्क शिक्षा वियगु जक च्वयो तःगु दः । मौलिक हकखय् तयो तःगु ब्यवस्था ब्यवहारय् छ्यलय्गु (कार्यान्वयन याय्गु) लि सरकारया ध्यान वांगु मरु । संविधानया काथं हिंछगू व हिंन्यगू तगिं मा.वि. तहखय् ला । अतकः सरकारं न मकाथंया शिक्षक पिनिगु दरबन्दीया ब्यवस्था याता न छुं भौतिक पूर्वाधार वा छुं अनुदानया ब्यवस्था हे याता । अथे जूगुलिं सामुदायिक विद्यालयं ब्वनामि पिन्के ध्यबा कायो ब्वंकय् माल च्वंगु दः ।

सरकारं मः काथंया ब्यवस्था याडः मब्यगुलिं भूगु

डयन्हयगूगु खवप पौ. बःछि पौ(पाक्षिक)

शैक्षिक संस्थात कतया भरय् म्वाय् माल च्वंगु दः । चिच्या-चिच्या हांगु सेमिनार(गोष्ठी) अन्तरक्रिया वा तालिमत व चिच्या-चिच्याहांगु विकास निर्माणया ज्यात नपां विदेशी तय्के लाहा फय्मःगु अवस्थाय् थ्यनय् धुंकल । विदेशी तय्सं नेपःया विद्यार्थी तय्कय् दःगु अन्यायया विरुद्धय् ल्वायगु संघर्षशील भावनाता कमजोर याय्गु नं तालिम व सेमिनारया नामय् करौडौ तका दां खर्च याड च्वंगु दः । थजगु ज्याखं भ्नीपुं शिक्षक, विद्यार्थीपुं न्ह्याब्ले सचेत जुयो तापाक्क च्वनय् मः ।

खवपय् सुं नं विद्यार्थीपुं धेबा मदयो ब्वनय् मखाना जक च्वनय् थः म्वेँ धाय्गु जिमिगु मति खः । नेदा हौं निसे खवपया गरिबपरिवारया ब्वनामिपिन्ता च्वय थ्यंके (उच्च शिक्षा) ब्वनय्ता डागू लाख तका दां तक सहूलियत ब्याज दरं नगरपालिकां ऋण ब्यू ब्यू वयो च्वंगु दः । थुगु आ.व. २०७७/७८ य् १४२ म्हा ब्वनामिपिसं उच्च शिक्षा ब्वनय्ता शैक्षिक ऋण मागय् यागु दः । वडा वडाय् शिशु स्याहार केन्द्र चाय्कः मा.वि. कलेजत न्ह्याकः वयो च्वंगु नपां शैक्षिक ऋण नपां बियो नगरपालिकां थःगु स्रोत व साधनं ह्यैँ दः तले शिक्षाया जिम्मेवारी कुबियो वयो च्वंगु

खाँ सकलसिता ब्याकः च्वडा ।

देया लागिं लिपाता मालिपुं जनशक्ति ब्वंलाकय्गु मतिं इतिहास, भूगोल, राजनीतिशास्त्र, संस्कृति, नेपालभाषा कायो न्ह्यागुहे कलेजं व विश्वविद्यालय ब्वनिपुं नगरबासी विद्यार्थीपिन्ता फुक्क छात्रवृति बियो वयो च्वंगु खाँ नं ब्याकः च्वडा ।

जिमिसं खवप विश्व विद्यालय चाय्केता मदिक्क कुतः याड वयो च्वडागु दः । संसदीय समितिं नपां विश्व विद्यालय चाय्केता सिफारिस याय् धुडा नं विधेयक संसदं पारित जुय मफः नि । विधेयक पारित जूसा शिशुशाला निसें विश्वविद्यालय तक न्ह्याकः च्वंगु खवप नगरपालिका दे याय् हे न्हपांगु (नगरपालिका) स्थानीय तह जुई । सायद वनं मथां पू वानिगु आशाय्या । सुभाय्

(२०७७ फागुन १४ गते जूगु खवप नगरपालिका पाखं न्ह्याक च्वंगु खवप माध्यामिक विद्यालयया २१ कगू, खवप कलेजया १९ कगु व शारदा क्याम्पसया ३० कगू वार्षिक उत्सव ज्या इवःसं वि.ब्य.स. या नायो नगर प्रमुख सुनिल प्रजापति जु या मन्तब्य)



संसद पुनःस्थापना लिपाया भावी राजनैतिक दिशा

• विवेक

खाँ न्ह्याकय्, भारतय् सन् १९७९ सं क्वचःगु निर्वाचन लिपा प्याहाँ वगु राजनैतिक अस्थिरता पाखं । भारतय् सन् १९७९ सं जूगु लोकसभाया विचनय् जनता पार्टी बहुमत काला । मोरारजि देसाइ, जगजीवन राम, चरणसिंह जनता पार्टीया वरिष्ठ नेतात खः । बहुमत कःगु पार्टीया पाखं मोरारजि देसाइ प्रधानमन्त्री निर्वाचित जुला । अथेनं पार्टीया सांसद पिसं साथ मध्यगुलिं देसाइ सरकारं बांलाक ज्या याडः केनय् मफूत । सरकार कमजोर जुयो च्वंगु इलय विपक्षी दलं प्रधानमन्त्रीया विरुद्धय अविश्वासया प्रस्ताव दर्ता याता ।

चरणसिंह व जर्ज फर्नान्दीजं क्याबिनेट मन्त्रीं राजिनामा बिला । पार्टी दुनयया विवाद भन चर्को जुयो वांसेलीं जनता पार्टीया पूर्ण बहुमत दयकं दयकं थःगु पार्टीया सांसद पिसं साथ मध्यसेलिं सरकार अल्पमतय् लागुलिं नपां विपक्षी दलं अविश्वासया प्रस्ताव तःगुलिं प्रधानमन्त्री मोरारजि देसाइ राजिनामा बिला । राष्ट्रपति संविब रेडुडी संसदय् बहुमत दयकः सरकार गठन याय्ता आहवान याडः दिल । जनता दल (एस) या नेता चरणसिंह कांग्रेस (आई) व मेमेपुं नपां मिलय जुयो बहुमतया सरकार दय्केगु च्वयो प्रतिवद्धता प्वंकसेलिं वयकता हे प्रधानमन्त्री नियुक्त याता ।

प्रधानमन्त्री नियुक्ति जुय धुंसेलिं संसदय् विश्वासया मत काय्ता सःतगु बैठकय् न्हपा समर्थन ब्यूम्हा कांग्रेस (आई) नं पार्टी समर्थन लिता कःगु सार्वजनिक याता । प्रधानमन्त्री चरणसिंह विश्वासया मत काय् मफैथें च्वडानिं तुरुन्त राजिनामा याता । संसदय् तःक कुतः याडा नं छगू हे दलं बहुमत काय मफूसेलिं जिहे मजियो हकनं लोक सभाया चुनाव जुला । सन् १९८० खय् जूगु संसदीय निर्वाचनय् कांग्रेस (आई) नं बहुमत काला । अलय इन्दिरा गान्धी प्रधानमन्त्री जुला । वनलिपा तिनि भारतय् उब्लेया लागिं राजनैतिक अस्थिरता मता ।

ठीक्क अथेहे नेकपाकय् थ्यं मथ्यं दुईतिहाइ सांसदत दःगु खः, दः । ओली नेकपाखं प्रधानमन्त्री निर्वाचित जुला । वयकता वयकया दल याय् पिसं हे साथ मबिला । २०७७ पुस ५ गते प्रधानमन्त्री केपी ओली प्रतिनिधिसभा विघटन याता । विघटन जूगुप्रतिनिधि सभा माघ ११ गते सर्वोच्च अदालतं पुनः स्थापना याता । प्रतिनिधिसभा पुनःस्थापनाया बुखाँ प्याहाँ वसेलिं

विरोध सभाया लागिं चितवन थ्यंपुं प्रचण्ड व माधव नेपाल नेम्हासिं वं वाता वं वाता लड्डु नकला, लसता प्वंकला । अमिसं तः ह्यांगु विजय जूगु मति तला । वहे काथं खाँ ल्हाडः जुला । कार्यकर्तापिन्ता तक जानकारी मध्यसें अपुं सुटुक्क यें ल्याहाँ वला अलय शेरबहादुर देउवा प्रधानमन्त्री जुयो बिया दक आग्रह याय्दक देउवा निवासय् वाना । देउवां पार्टीया वैधानिकताया न्ह्यस न्यंसेलिं प्रचण्ड नेपाल काथं मछिड गय् याय् गय् याय् जूगु बुखाँ प्याहाँ वला । संसद पुनः स्थापनालिपा वयफःगु घटनाबारे सचेत नागरिकपुं धःसा तस्कं चिन्ता कायो च्वंगु दः ।

निर्वाचन छगु प्रजातान्त्रिक प्रक्रिया खः । निर्वाचनय् छु पार्टी व सुमनू त्याइ धाय्गु स्वयो प्रजातान्त्रिक प्रणाली त्याइगु खः । प्रतिनिधि सभा पुनः स्थापना जुय धुंसेलिं करोडौं जनताता छकलं राजनैतिक प्रशिक्षण वियगु मौका जक मखांगु मखु देश अस्थिरता पाखय् वानिगु सम्भावना अप्वयो वान । प्रचण्ड-नेपालं मति तःगु जुयमः पुनःस्थापनानपां प्रधानमन्त्रीया राजिनामा नपां-नपां वइ दकः । अथे अःपुक केपी ओली राजिनामा विइगु जूसा विघटन हाँ हे राजिनामा विइगु जुई । पटक-पटक प्रधानमन्त्री जुयो राज्य चले याय धुंकपुं ताः ई तक पार्टी न्ह्याकः च्वंपुं नेतातय्के भ्रम खाडः अचम्म जुयो च्वंगु दः ।

फुककसिनं स्यूगु हे खाँ खः । संसदय् छुनं दलया बहुमत मरु । थजगु इलय् सरकार दय्केता नेकपां कांग्रेसया साथ मकःसिं मगा । थुकि मेगु लाँपु खानय् मरु । अः याय्गु इलय् नेकानं प्रचण्ड-नेपाल गुटता समर्थन याइगु सम्भावना तस्कं म्हवें जक खानय् दः छाय् धःसा निर्वाचन आयोगं ओली व प्रचण्ड-नेपाल गुटता आधिकारिकता ब्यूगु मरुनि । निर्वाचन आयोगं नेगू नायोया हस्ताक्षर दःगु पत्रता जक आधिकारिक मानय् याय्गु पत्राचार याय् धुंकगु दः ।

संसदीय दलया नेतातय्सं बैठक सःमततलय् उकिं आधिकारिकता दै मखु । दलं चिइकः छ्वइगु संसदया बैठक सःतिजक कल्पना हे याय् फै मखु । उकिनं ओलीता संसदीय दलया नेताखं जक मखु, साधारण सदस्य खं नपां लिकायो छ्वयागु जानकारी नपां निर्वाचन आयोगय् तक वियधुंगु अवस्थाय् थ्यनय् धुंकगु जुल । प्रचण्ड-नेपालं तप्यंकः प्रतिनिधि सभाय्

डयन्हयगुगु स्वप पौ, बःखि पौ(पाक्षिक)

प्रस्ताव पेश याय्ता भावी प्रधानमन्त्रीया नां नपां क्वछिड चवयो तय् मःगु कानुनी ब्यवस्था दः । प्रचण्डता प्रधानमन्त्री काथं नं प्रस्ताव याड्बल्य् नेकांनं समर्थन याड्गु छुं गनां लक्षण खानय् मरु । थुगु वास्तविकता फुक्कं थूम्हा ओलीं नेकां नपां सहमति याड् मंकः (संयुक्त) सरकार दय्कः वानिगु सम्भावना अपलं खानय् दयो वयो च्वंगु दः ।

प्रतिनिधिसभा पुनः स्थापना लिपा केपी ओली न्हापायाय्गु अवस्थाय् हे थेनय् धुंकल निर्वाचन आयोगं पार्टीं तज्यागु आधिकारिक जानकारी मळ्य् तलय् प्रचण्ड-नेपाल गुटता कानुनं म्हासिड मखु । अजगु इलय् अः प्रचण्ड-नेपाल गुटता कानुनी समस्या वै । अमिगु गुटं न अःपुक अविश्वासया प्रस्ताव हे दर्ता याय् फैं न निर्वाचन आयोगं विस्कं पार्टीं खःदक मान्यता हे काय् फैं । नेगु गुटया ल्वापु खय् छम्हा सिं मेम्हासिता पार्टीं पितिडः चिडकः छ्वयागु दक हालः च्वंगु दः । नेकपा अथे धाय्गु मूलगु पार्टीं गुगु खः धाय्गु हे अः याय्गु मुख्य विवाद खः ।

ओलीं अपलं विकल्पता छ्यली । प्रतिनिधिसभा विघटन जुय हॉ अविश्वास प्रस्तावखय् सही यापुं तःम्हा सांसदत थः दखय् सालय् धुंकल । अभ् मन्त्री पद वियगु लोभ क्यडः प्रचण्ड-नेपाल पक्षया सांसद पिन्ता लोभ क्यडः सालिगु अपलं सम्भावना दः । प्रचण्ड-नेपाल गुटता हॉग लिसें लियता ओली लिपा मलाड्गु वयागु ज्याखं क्यडः च्वंगु दः ।

सांसद न्यायमिय याड्गु सम्भावनाः

२०५३ सालय् शेरबहादुर देउवा सरकारया विरोधय् अविश्वासया प्रस्ताव प्रस्तुत याता । थःगु सरकार बचे याय्ता देउवां राप्रपाया सांसदत बालाराम धर्तिमगर, शान्ति शम्शेर राणा, बुद्धिमान तामाड, विष्णु विक्रम थापा व महेन्द्र रायता विरामी जूगु त्वहः तय्कः ट्वलं डलर बियो बैड्ककय् चाहिड्कय् छ्वता । नेमकिपाया सांसद भक्त बहादुर रोकायाता अपहरण याडः भारतया पूर्णियाय् थंकला । उगु ज्याखय् उब्लेया आइ जि पि अच्युत कृष्ण खरेल, सांसद पुं शिवराज जोशी व राजेन्द्र बहादुर शाह पिनिगु लाहादःगु खॉ सिय दय् धुंकगु दः । अः सरकार गठनया प्रक्रिया सुरु जुयवं हे सुरा सुन्दरी काण्ड, सांसदत न्याय मियया फोहरी कासा हकनं म्हेतिगु मखुला ? थजगु घच्यापुगु विकृति नेपालय् जक मखु भारतय् सन् १९९३ खय् नरसिंह रावया सरकारया विरुद्धय् अविश्वासया प्रस्ताव दर्ता याता । वयागु सरकार ल्यंकः तय्ता छम्हा जक सांसद मगागु खः । भारखण्ड मुक्तिमोर्चाया प्यम्हा सांसद दःगु लि राव जुं थःगु सरकार ल्यंक तय्ता रु. १९ करोड भारु (उब्लेया नेरु ३० करोड बराबर) दामं उगु पार्टीया सांसदत न्याता ।

सरकारयां म्वात अलय् लिपा उकिया आगं प्वल हः सेलिं रावया विरुद्धय् मुद्दा चले याता । गुगु काण्ड खय् रावता जेलय् नपां स्वथाड् बिल । उब्ले वयक प्रधानमन्त्रीं ल्याहाँ वानय् धुंकगु ई खः ।

आखिर दकलय् लिपाः निर्वाचनय् वानय् फः ।

दुई तिहाई मत कायो तःगु दलं सरकार न्हाकय् फैंगु अवस्था खानय् मत । संसदय् सुयाय्गुं हे बहुमत दैगु अवस्था हे मरुसेलिं लिपा निर्वाचनयाय् हे लाँपु मज्वसे मगा दक वल धःसा आश्चर्य चाय माली मखु ।

नेपः या राजनीति थुगु हे लाँपु खं हज्याड च्वंगु खानय् दः । ओली व प्रचण्ड-नेपाल नेगु गुटता नेकाया समर्थन मदय्कः सरकार दय्केता बहुमत थय्कय् फैंगु सम्भावना मरु । नेकां नं थःगु न्हयलुवाय् बाहेकं मेपिन्ता समर्थन याड्गु सम्भावनांनं मरु । नेकपा नेगु गुटय् औपचारिक विभाजन जूसा निर्वाचनय् वानय्गु नेकां नं थःगु अनुकुलता खांकी । उगु इलय् संयुक्त सरकारया अलमलय् च्वड च्वनय्गु नेकांयाय्गु हे बहुमतया सरकार दय्केता निर्वाचनयाय् हे लाँपु मल्यंइक धाय् फैं मखु । औपचारिक विभाजनया लागिं सरकारं अध्यादेश नं ह्यफः । उकिता नं नेकां याय्गु हे समर्थन मदय्कं मगा । अजगु ई वल धःसा नेका (देउवां) नं ओलीता हे क्वातुम्हा पासा भः पिड् थुकी नं उलि शड्कायाड च्वनय् माली मखु । छाय धःसा स्थानीय चुनावय् एमालेया विरुद्धय् गठबन्धन यागु माओवादी थाय् थासय् नेकांया ग्वाहाली खय् निर्वाचित जुसेलिं नेकाता धोखा बियो संसदीय निर्वाचनय् एमाले नपां मिलय् जुयो नेकाता यक्व थासय् बुकगु देउवां काचाक्क लुमांकी मखु ।

धायो तः थें इतिहास दोहरय् जुयो वै पागु ढड्गु ज्वड । नेपालय् २०५३ सालया संसदीय फोहरी कासा हकनं लिफ्यडः न्हाकय् फःगु व छुं हे मजियानिं भारतय् चरणसिंह या पालाय् थें हकनं निर्वाचनया लाँपु हे वानय् मालिगु सम्भावना खानय् दः । चुनावय् वानय् मालिगु स्थितिवल धःसा प्रतिनिधिसभा पुनः स्थापना लिपा इड नःपुं नेता तय्गु ल्या चा जनतां अवश्य पिकाई ।

स्वप नगरपालिका नगरवासीतय्गु

थगु हे संस्था खः

करदातातय्सं इलय्हे कर पुलदिसँ

नगरयामु विकासयाता ग्वाहाली याड् दिर्सँ

पुरखा दयकगु सम्पति मीगु कला व संस्कृति

अन्तर नगर बुद्धिचाल व खवप नगर ब्यागु विद्यालय स्तरीय धिं धिं बल्ला कासा

प्रेस विज्ञप्ति

पत्रकार पासापुं, खवप नगरपालिकां कला-संस्कृति म्वाकःतयगु नपां कासाता नं उलि हे थाकायगु ज्या साड च्वंगु दः । छम्हा छम्हा ल्यासे ल्याम्हो पिन्ता छगू नं छगू कासा खय् दुथ्याकः तयमः धायगु मतिं खवप नगरपालिकां भलिबल, फूटबल, टेबुल-टेनिस, बक्सिड, कराँते, जिम्नाष्टिक नपां खुगू कासाया मदिकक तालिम ब्यू ब्यू वयो च्वंगु दः । बवनय् कुथि निसें कासाया विकास यायगु मतिं पूर्ण कालीन प्रशिक्षकपुं ब्यवस्था याडः विद्यालय स्तर निसें हे कासाता जीवनया अभिन्त अड्ग दयकेगु कुतः नं खवप नगरपालिकां याड च्वंगु दः ।

इलय्-ब्यलय् जुइगु कासाया धिं धिं बल्लाखं जक बां बांलापुं कासामिपुं ब्वलानिगु खः । श्वहे खाँ याता विचः याड खवप नगरपालिकां दायँ दायँसं छगू कासाया अन्तर नगर धिं धिं बल्ला याड वयो च्वंगु दः । न्हापांगु दायँ अन्तरनगर भलिबलया धिं धिं बलाकासा, नेगूगु दायँ अन्तरनगर सितेरियो कराते धिं धिं बल्ला कासा, स्वंगूगु दायँ एथलेटिक्स कासा सफलतापूर्वक व्वचाय्कगु खः । दायँ-दायँ पतिकं याडागु कासाया धिं धिं बल्लाखं जिमिता हौसला व प्रोत्साहन ब्यूगु दः । निर्वाचनया इलय् बियागु वचन (प्रतिवद्धता) छगू छगू यायां पूर्वांक च्वडागु दः ।

२०७७ साल सुयातां हे बांला मजू । हलिमय ब्याक डाडः पुड वड च्वंगु कोभिड १९ भ्वल्वचं अपलं ई बन्दाबन्दी खय् हे वितय् जुल । उगु इलय् अपलं मनूत कोभिडया भ्वल्वचं संक्रमित जुल । कासामिपुं नं उकिं तापाय् मफू, नागरिक पिनि दश्वी भौतिक दुरी कायम याडः ताः तापाक च्वड हज्याय्मःगु इलय् कासाया ज्या इवः हज्याकय् फैगु सम्भव मरु । हकनं हे कोभिड भ्वल्वयया ग्याचव फुक्कं मतानि । ब्रुलुहुँ जनजविन भाति भाति यायां सहज जुजुं वथें च्वडानिं लिपालासां थुगुसीनं न्हापायाय्गु दायँ थें च्सेसया अन्तर नगर धिं धिं बल्ला कासा याय्गु क्वः छ्यूगु खः ।

चेस कासाखय् खवप, देशयाय् हे हज्यागु जिल्ला मध्ये खः । देशयाय् हे हिम्हा अन्तर्राष्ट्रिय आर्विट्रर मध्ये खवपय् नेम्हा दः । राष्ट्रि आर्विट्ररया लाइसेन्स दःपुं देशय् दुनय्या उय्म्हा मध्ये खवप जिल्लाय् दक हिम्हा दः । अथेजुगुलिं प्राविधिक हिसावं खवप अपलं हःनय् ला । १९ दा क्वयया राष्ट्रिय उत्कृष्ट (राष्ट्रिय च्यापियन) कासामि नं खवपय हे दः । खवपया कासामि नेपाल च्याम्पियन जुय धुंकगु दः । खवपं वि.सं. २०६१ सालय् चेस कासाखय् राष्ट्रिय प्रतियोगिता बांलाक हे क्वचाय्के धुंगु दः । खवप नगरपालिकां दायँ दायँसं ग्वसः ग्वयो याड वयो च्वंगु विद्यालय स्तरीय धिं धिं बल्लासं चेस नं दुथ्याक वयो च्वंगु दः । वांगु दायँ नगरपालिकां ग्वसः ग्वगु विद्यालय स्तरीय कासाया धिं धिं बल्ला कासाय् थी थी विद्यालयं दकलय् अप्वः च्सेसया धिं धिं बल्लाखय् पीगुगु बवनय् कुथिया नेस व नीम्हा कासामिपिसं ब्वति कःगु खः ।

थुगुसी म्हुवचा इलय् बुद्धिचाल संघया पासापिसं अपलं मेहनत याड चेस कासाया धिं धिं बल्ला ग्वसः ग्वयो दिल । ज्याइवः न्ह्याकय्गु ज्या छसिकाथं न्ह्याड च्वंगु दः । न्हापाया दायँ दायँ पतिकं थें थुगुसी जुइगु अन्तरनगर च्सेसया धिं धिं बल्ला नं तस्कं भब्य रुपं क्वचाइगु आशा याय् ।

अन्तरनगर च्सेसया धिं धिं बल्ला कासाया उलेज्या नेपाल मजदुर किसान पार्टीया नायो नारायणमान बिजुक्छें (का.रोहित) जुं याड दी । २०७७ फागुन २९ गते निसें चैत्र ३ गते तक जुइगु उगु १० गू धिं धिं बल्ला कासाया गवसाखल मूल समारोह समिति व सचिवालय, निर्णायक समिति ग्वाहालीमिपुं परिचालन समिति, प्रचार समिति, सिरपा ब्यवस्थापन समिति, जलपान समिति, यातायात व बास ब्यवस्थापन समिति, ज्वाली ब्यवस्थापन समिति, दबु छायाय् व ग्राउण्ड ब्यवस्थापन समिति, प्राथमिक उपचार समिति व कासामि निरीक्षण समिति-उपसमितित निस्वाड उगु समितित हछ्याड तयारीया ज्या जुयो च्वंगु दः ।

लसताया खाँ खः, अन्तर नगर चेष धिं धिं बल्ला जुइगु इलय् हे ख्वप नगर दुनय्या ब्वनय् कुथिया दथ्वी अन्तर विद्यालय कासाया धिं धिं बल्ला कासा नं जुयों तं च्वनि । वांगु दायँ अन्तर विद्यालय कासाया धिं धिं बल्लासं ७२ गु ब्वनय्कुथिया २१०० म्हा स्वयो अपः ब्वनामि कासामिपिसं ब्वति कःगु खःसा थुगुसी थ्व स्वयो अपः ब्वनय्कुथिया कासामिपिसं ब्वति काइगु आशा याडा । उकियाता तयारी यायता नं कासामि पासापुं ज्या सााड च्वंगु दः । कासा जुयो च्वंगु इलय् ख्वप दे ब्याक 'नगर खेलकुदमय' जुइगु आशायाड च्वडा । थुगुसी भलिबल, टेबुल टेनिस, उसु, कबड्डी, टेक्वान्डो, करँते, एथ्लेटिकस, ब्याटमिन्टन, फुटसल व खो खो या धिं धिं बल्ला कासा जुई ।

ल्यासे ल्याम्होपिन्ता धुम्पान, मध्यपान व लागु औषध थजगु कुलतय् फसय् मयासें छम्हा अनुशासित नागरिक ब्वलांकय्गु जिमिगु उद्देश्य खः । समाजता सभ्य व सुसंस्कृत दय्केगु उद्देश्यं नगरया वडा वडाय् शारीरिक ब्यायामया लागिं ब्यायामशालात दय्कगु, गुगु कलेजय् नं बुलुहुँ तय यंक च्वंगु दः ।

चेस कासाया धिं धिं बल्ला सं अः तक नी न्यगू नगरपालिकां नां च्वकय् धुंकगु दः । गुगु नगरपालिका या नां थथे दः ।

- १) मध्यपुर थिमी नगरपालिका
- २) बनेपा नगरपालिका
- ३) भक्तपुर नगरपालिका 'ए'
- ४) भक्तपुर नगरपालिका 'बी'
- ५) भिमेश्वर नगरपालिका
- ६) बुटवल उपमहानगरपालिका
- ७) चाँगुनारायण नगरपालिका
- ८) दैलेख नगरपालिका
- ९) दमक नगरपालिका
- १०) धरान उपमहानगरपालिका
- ११) हेटौडा उपमहानगरपालिका
- १२) कैलाली नगरपालिका
- १३) काठमाडौं महानगरपालिका
- १४) कीर्तिपुर नगरपालिका
- १५) ललितपुर महानगरपालिका
- १६) महालक्ष्मी नगरपालिका
- १७) नागार्जुन नगरपालिका
- १८) नेपालगञ्ज उपमहानगरपालिका
- १९) पोखरा महानगरपालिका
- २०) राजबिराज नगरपालिका

२१) रुकुम नगरपालिका

२२) सूर्यविनायक नगरपालिका

२३) टोखा नगरपालिका

ख्वप नगरपालिका पाखं ब्वति कायो अन्तर नगर चेष धिं धिं बल्ला कासाया कासामिपुं

भक्तपुर 'ए'

गणेशमान दुवाल (सी)

जगन्नाथ ताम्राकार

बलराम नापित

राजेश कक्षपति

गणेश अवाल

भक्तपुर 'बी'

सुमन सुवाल (सी)

बिक्रम जति

निकेन कुसाथा

बिजय जति

केशव मानन्धर

कासाखय् न्हापलागु पुचःता १,५०,०००-तका दां ल्यू लागु पुचः ता १,००,०००- तका दां, ल्यू या ल्यू लागु पुचः ता ५०,०००- तका दां व छगू छगू कासाखय् बार्डया दकलय् च्व जःम्हा उत्कृष्ट छम्हा कासामिता ५०००- तका दां सिरपा लः ल्हाय्गु ज्या याई । थुगु कासाया धिं धिं बल्ला याकेता मूक्कं २६ लाख तका दां छखय् लिइकगु दः ।

पासापुं,

कासाया लागिं मः काथंया पूर्वाधारत मदय्कः बांबां लापुं कासामित ब्वलानिमखु । जिमिसं थी थी कासाता ह्छ्याय्ता थुकिया पूर्वाधारत दय्क ह्ज्याय्गु ज्याखय् नं बः बियो च्वडागु दः । ख्वप नगरपालिका वडा नं. ८ खय् कवर्ड हल दय्क च्वंगु दः सा ख्वप नगरपालिका वडा नं. १० खय् कवर्ड हल दय्केगु ज्या मथाहे न्ह्याकिगु जुयो च्वंगु दः ।

दकलय् लिपा, वैगु फागुन २९ गते सुथाय् ७ बजे उलेज्याया च्याली ख्वप नगरपालिका वडा नं. १ या च्वंगु वडा कार्यालय हःनय् नं न्ह्याडः नगरया मू मू लार्थं नासमना, तःमाही, सुकुलढोका, इनाचो, तचपाल, सूर्यमढी, च्याम्हासिंह जुयो कासा म्हेतिगु महेश्वरी बैङ्कवेटय् थ्यंकः उलेज्या जुई । थुगु धिं धिं बल्लाया बारे थः थः गु सञ्चार माध्यमं दे डांक प्रचार-प्रसार याड ग्वाहाली याड दियता सकल सञ्चार कःमि पासापिन्ता दुनुगलं निसें इनाप याय् ।

ख्वप नगरपालिका

होली दुनय्या रङ्गी चङ्गी पहः

आशा कुमार चिकंभञ्जार

चिकुलाया पुगाडःग्वराचिंगु मन तिप्यंकः ताल्ला दूस्वः वयवं मनय् बलुहुँ लसताया पछिमायँ थाई । अथेँ अथेँ लयतःगु चञ्चल मनं सुलुपुई अलय न्यनय् हायँपुक कर्णप्रीय सलय् बाँसुरी पुई । पुगाडः पुचायो च्वंगु तुतिपला धिमाय सलय् प्याखं ख्वायँ काई । अलय् 'वातेप दःतलय् छु किया धन्दा' धाधां धाँ थाडः धःपुजा, द्यो पुजा, कयता पुजा, ब्योहज्या नपां जाया वगु बैसया डतलय् ह्यांगु रङ्ग इलः बैसया रसबस नपां रतिरागया म्यँ त अथे अथेँ स्वत स्फूर्त प्याहँवै - होलीया मेला मय्जुनं मस्यूला ? अबिर भातिचानं तय् म्हाला ?

अबिरयां होली, रङ्गया होली, लसताया होली, होली पुन्हीया तिमिला थें चं चं धःगु, अलय चिकुला फुड बसन्त सालः चुलिजायो वगु सिमाचुलीथें मनय् हवगु तकुस्वं थें थः न्यासी चायो, गुई हवगु तकु स्वां स्व स्वं न्यासीचःम्हा प्रकृतिथें न्याकुं ककं प्याहाँ वम्हा ल्यासे मय्जुं म्यँ छुड है- 'फार्गुन बलय याकचा जि वानय् मछाला ।'



थःगु थाय्या भौगोलिक ज्ञान मनू तयसं भोगय् याडः प्रकृति नपां भेलयपुडवानय् फय्केता अनेक बुद्धि पिकाल । मनूत सभ्यताया स्वन्हताकी गगं गगं थमनं खाडागु खौं न्यँकं बाखं याड काँकां वान थः न्हँगु पुस्ता ता । म्यँ चिडः, हाल न्यंकः वाडचवन थःमचा खाचा तय्या । वहे सभ्यताया विकास नपां लुइकगु बुद्धिता बलुहुँ न्हँगु पुस्तां त्वःफिडकं फिडकं वांसेलिं भौगु म्हासिडका प्वंदःगु छ्वःमा थें तिस जक बाकी दैगु खःला, विज्ञपुं तस्कं चिन्ता कायो च्वंगु जुल । अलय् 'भ्यालय् दांक तुकंमः वहे ल्यासे जिता

मः' होलीया लय खय् हाल वांगु म्यँ या भ्यालय दांक तुकंमः तय्गु चलन छगू देशया बाखंथें जुय धुकल तुंकचाया महत्व नपां थमनं हे तू सयकः, सालय् यंकः चिकं काकः धाथिंगु छयासा मरुगु चिकं दय्के मफूसेलिं कतया देशं वगु अनेक नांया चिकंखय् हवाड नसा नय्गु यासेलिं चिकं नपां थः ल्वाक ज्याड अनेक लवय् मुड जुल । वहे तुकं सुकु खौंः दाच्छीतक सुकुचा कँ नयो च्वंतलय् 'सुगर' धायगु मरु हँ बाज्याया खौं । अः तुकं मँ हानय् सःपुं भौमचात मदयो वांसेलिं सुकुचा कँ गथेयाड नै । अलय् वर्षया अरबाँ तका विदेशं हःगु तरकारीत न्याड, किटनाशक वास थुडः तःगु तरकारी न नं उखुम लवयया लवगित मुड चवन । उकिं भ्यालय दांक तुकंमः तय्गु भौगु संस्कार ल्यंकः तय् मफूसा न्हँ न्हँगु लवय् भन अपःमदै जक धाय् फै मखु ।

होली पौराणिक बाखं दुनयँ द्रुहँवाड स्वय्गु खःसा हिरण्य कश्यपं घोर तपस्या यागुलिं स्वर्गया जुजु ईन्द्र वया जहान कयाधूयाता अपहरण याड हल । थव खाड नारदं थजगु नैतिकतां मब्यगु, धर्म त्वःतय्गु ज्या याय् मज्यु धायो सम्भेयासेलिं ब्रम्हचारी नारदता जिम्मा बियो ईन्द्र स्वर्गयतुं ल्याहाँ वान । भगवान विष्णुया भक्त नारदया न्ह्याळें भगवान विष्णुया श्लोक, भजनयाड जूगु कयाधूया प्वथय् च्वंम्हा प्रल्हाद चां न्हिं न्यंसेलिं वनं मांया प्वाथं प्याहाँ वसेंनिसें भक्तिरसया भावय् दुडः थःनं राक्षसकुल याय्म्हा जूसां विष्णुया भक्तजुयो भक्त प्रल्हाद जक नां जाल ।

'क्वल्हँ पता लथ्याय्गु, कयातुबलय् हे बेखुयमः' धायोतःथें मचातय्या जीवनोपयोगी शिक्षा, सामाजिक व्यवहार, नैतिक संस्कार नपां राजनैतिक शिक्षा नं इलय् हे बियमः । गुकिं छम्हा असामान्य बरदान दःम्हा हिरण्य कश्यपया काय्या हे मन हिडकः भौगु लाँपुई छ्यलय् फःधाय्गु शिक्षा नं काय्यफः ।

हिरण्य कश्यपं कःगु असामान्य बरदानं तस्कं मातय् जुयो घमण्डया रथय् च्वड अनेक अत्याचार याड जुम्हासिया काय्य हे थःम्हाशत्रु विष्णुया भक्त जूगु खाड अनेक जुक्तिं थःकाय्य स्याय् मफू सेलिं मिमथिइगु वरदान कायो तःम्हा थः केहँनं मिखय् दुब्वाड प्रल्हादता स्याय्गु योजना काथं मिखय् दुब्वाड वांम्हा होलिका हे मिं न्वयो सीगु, प्रल्हाद छुंमजगु बाखं दुनय् सत्य गुळें

डयन्हयगुगु स्वप पौ. बःखि पौ(पाक्षिक)

बुडमखु । सत्य नाखं चुडकय् फैमखु, मि न्वयो खरानी याय् फैमखु । फसं पुडकय् फैमखु, अलय् छुं नं शक्ति क्वत्यःसां बुडमखु धाय्गु सत्य खाँया शिक्षा काय् फः । उकिं होलिका दहन काथं होली डाय्कगु खाँ नं छुपु लोकबाखं काथं काड वयो च्वंगु दः । गुकीया शिक्षा काय्ता बाखं खोसीं थें तछ्याड नय् सय्के मः । गुगु इलय् जुजुपिन्ता बेक्व मिखां तक स्वय मसगु इलय्या लोकबाखं दुनय्या सत्य-असत्यया वस्तीपु बस्ती तछ्याड जक नय् फैगु सन्देश थुडकय् मः । ईकाथंया बाखंया प्रतीकत वर्तमान समाजया पात्र नापं त्वाय्चिंक स्वय्फःम्हा हे बांलाम्हा ब्वनामि जुय फै ।

मनूया जीवनय् ऋतुया प्रभाव तस्कं लाइ । उकिया लिचव काथं मनूया नखा-चखा डाय्की, नखाचखा नपां ऋतुम्यें हाली । ऋतु म्यें नं प्याहाँ वडगु बाजां, बाजा नपां छिडगु न्याकुं पला, प्याखं ख्वायँ अलय् चंचं धःगु ख्वालय् ह्याउँगु अबिरं लाडब्युगु हिंसी भय्बियो क्वक्व छुडः वांम्हा मय्जु खानय् वं ल्याम्होम्हा भाजुया दुनुगलं म्यें पिज्वइ । 'अबिरया होली, तंचायाला ल्यासे' । अबिरं छंगू ख्वः हिंसी दय्क बी ॥

प्यख्यरया लकस चं चं धायो, वाउँसे च्वंगु लकसदूनय् थःता तांकः 'नागबेली गुँया लौं चां जिता न्याकुं काय्कल धाधां, वाउँगु धायँया लासाय् देड मनजिगु वाउँल, मुखुब्यना हवगु स्वानं जिता न्हयकल, धाधां यौवनया प्रतीक पिब्वयो स्वनिगलय् 'चीर स्वाय्गु' प्रथा अतकं ल्यं दःनि । गुकिता अःतक नं अशिललता दुनय्या शिललता काथं कायो च्वंगु दः । गुकियाता उगु इलय्या 'जनसंख्या' विषयया ल्यासे-ल्याम्होया इलय वैगु प्राकृतिक नियम काथं कायो धाइ-

'स्वां धाय्गु वसन्तया इलय जक हवै'
मनू जुनी जौवन धाय्गु छक जक वै ॥

दिन वई, लच्छी बिइ बुलुहुँ दाच्छीया दिनसं ऋतु व मासया ल्या खा खां थी थी नखा चखा, संस्कार-संस्कृति डाय्की । समाजय् ल्वयकः जुयमः धाय्गु मतिं फःसांन डाय्क च्वनि, मफूसां नखा डाय्क च्वनि । छाय्धःसा उकि दुनयँ भीगु थःगु म्हासिडका दः । थः जुयो म्वाडः च्वडागुयाया छगू गर्व दः । अलय न्हि छ्याडागुया छगू पहः, नखा डाय्कागुया छगू फूर्ति, अलय थुगुसीया नखा डाय्कागुया दाच्छीतक याइगु चर्चा नपां मनू जुयो म्वाडागुया सफलता व असफलताया अमुई लाडः थमनं थःकाय्-म्हाय्, छय्-छुई पिन्ता काँ कां संस्कार व संस्कृति चाय्कं नं लःल्हाड वानि मचाय्कनं लः ल्हाडः यंकी ।

अथेयां होली छगू मिसा-मिजंया दश्वी थःवं थःवय् छम्हसैं मेम्हासिनं हिंस्याड हिंसी-ख्याली याइगु छगू चखा नं खः । गुलिं ल्याम्हो चापुं होलीया म्यें हाल मादल (मगः खिं) थाडः हिंस्याडः

मिसा तय्ता कय्क म्यें हाल बजार चाहिलिगु अः ताड हे वानिन । होलीं पुन्ही निसैं होलीया लयखय् म्यें हालः अबिर ईकः लसता प्वंकय्गु ज्या याई । अथेहे थी थी त्वालय् पुचः मुडः भ्वें डाय्कः, अबिर होलः लसता प्वंकसा, थी थी गुथी दाफा-भजन याय्पिनि लसतांपुजा डाय्क, गुँभवयँ डाय्क अबिर नपां म्हितय्गु नं याई ।

अलय् थी थी मोबिल, इनामेल इलः, ईक वयो च्वंगु विकृति धःसा हतय् मयांसैं मगा । मसैं (तराई) धःसा होलीं पुन्हीया साति खुन्हु जक 'होरिया' दक थुगु नखा मानय् याई । न्हुम्हा भौ (तताजु) नपां किजाभतपुं अबिर ईकः, रड्गु ईकः रसरंग यायां अनेक छेडछाड याड म्यें हाल थुगु नखा डाय्की । अलय मनूया पुचःमुडः ढोलक थाडः 'जोगिरा सररर' धाधां अनेक छेड याडः डाय्की । अलय तःजु (तताजु) व किजा भतया दश्वी अनेक व्यड्गु याड ब्योहयागु दायँ 'होरिया' धायो डाय्की ।

वसन्तया आगमनया छगू लसता रड्गीन होली, वसन्तया सिमाचुली नपां जासेवगु बैस ब्वयो लसकुस याइगु थुगुनखा दुनय् छगू मनया लसता पिज्वइगु नखा खः । नखा वै, मनय् छगू किसिमया आनन्दया सास ल्हाई । थः दुनयँ नखा दुबिकः नखा दुनयँ थःदुबिडः छगू च्वयो मतगु अलिखित संविधान थें मानयमयासिं मगागु काथं डाय्की । ऋतु काथंया ऋताहार नसा ज्वलं नपां जिवयता निंगु हिताहार नसा ज्वलं नयो ज्यू बलाक च्वनि । अलय छगुकाथं बःतानय्गु ज्या याई । छगू काथं मन चञ्चल जुइगु इलय मने छगू सिर्जनात्मक अभिव्यक्ति प्वकि । ज्या वड ल्याहाँ वपुं मनूत थःगु हःनय् छुंखाड अकिता स्व स्वं म्यें चिनी । छगू दसु त्रिपुरेश्वर हःनय् कालमोचनता स्वयो चिंगु म्यें-
प्यखय् प्यम्हा थाड तःम्हा सिंग मखुला ?
वया हनय दाड च्वंम्हा जुजु मखुला ?

न्हागु थजु संस्कार भीगु म्हासिडका पिब्वय्गु ई खः । संस्कार व संस्कृतिं हे थःगु जात-जातिया पहिचान क्यड च्वनि । होली डाय्किगु चलनं भी सुखः ? धाय्गु क्यनि । उकिं मनूया संस्कार नपां संस्कृति चा नपां न्हि थें, जीवन नपां मृत्यु थें, सुथः नपां बहनी थें, न्हि नपां चाथें त्वतां त्वतय् मफय्कः, दिन नपां किचा थें वयो तं च्वनि । भी दःतलय् संस्कृति लय्, संस्कृति दःतलय् भी ला व लुसिथें त्वःफिडकय् मफय्क वयो च्वनि । मनय् याड च्वनि । छगू रड्गी चडगी नखाः होलीं पुन्ही, लसताया नखाः होलीं अलय चं चं धःगु, चञ्चलताया छेड यायां बैसजःगुया चिं थजगु नखा होलीं पुन्ही ।

होलीया मेला मयजुं मस्याला ।
अबिर तला दक तंचायाला ॥

खप नगरपालिकाया ज्या भवः त

लैङ्गिक हिंसाविरुद्ध कानुनी साक्षरता अभियान

खप नगरपालिकाया प्रमुख सुनिल प्रजापतिया मू पाहाँल्य १ नं. वडास्तरीय सामुदायिक प्रहरी समिति व नपली सिर्जनानगर सामुदायिक प्रहरी टोल समितिया मंकः ग्वसालय लैङ्गिक हिंसा विरुद्ध कानुनी साक्षरता अभियान ज्या इवः छगू समारोहया दशवी जूल । उगु ज्या इवःसं मू पाहाँ प्रजापति जुं लैङ्गिक हिंसा गना अपः गरिबी व अज्ञानता दै आना जुइगु खः धायो दिसे म्यान पावर कम्पनी छगू काथं मनू न्याय मिय याइगु थाय् (अखडा) काथं विकास जुयो वयो चवंगु खौं ब्याक दिल ।

वयकलं सभ्य व सुसंस्कृत समाज दय्केता फुक्क किसिमया अपराधत म्हवचा यायां यंकयमः धायोदिसे समाज उत्थानया लागिं छगू छगू तह व समुदायपाखं फुक्क सिनं लाहापा स्वाडः हज्याय्मः धायोदिल ।

ज्या इवःसं सभाया नायो नपां खप नगरपालिका वडा नं. १ या वडाध्यक्ष श्याम कृष्ण खत्री जुं वडाबासीपिन्ता सचेतता बवलांकय्गु मतिं लैङ्गिक हिंसा विरुद्धया अभियान न्ह्याक चवंगु खौं ब्याकसे खप नगरपालिकां वडा-वडाय् मिसा मस्तय्ता आत्मरक्षा सम्बन्धी तालिम बियागु खौं लुमांकः दिल ।

वयकलं १०८ पी जग्गा व हनुमन्ते खुसी सिथय् सिथय् चवडः गाँजाया कुलतय् लाडः चवंपुं ल्यासे-ल्याम्होपिन्ता पाडः सचेतयाय्गु ज्या याडः चवडागु खौं काडः दिसे ल्यासे ल्याम्होपिन्ता कासाखय् मन बवसाय्केगु मतिं न्हपा-न्हपायाय् थें खप नगरपालिकां सहिद दिवसया लसताय् फागुन २९ गते निसैं चैत्र ३ गतेतक अन्तर नगर बुद्धिचाल धिं धिं बल्ला कासा याय्तांगु जानकारी बियो

दिल ।

ज्या इवःसं महानगरीय प्रहरी वृत जगातीया उपरिक्षक राजेश थापां समाज हछ्याय्ता शान्ति सुरक्षा मदय्क मगागु खौं स्पष्ट यासे नेपाल प्रहरीया पाखं लैङ्गिक हिंसा, लागु औषध व मेमेगु असामाजिक क्रियाकलाप म्हँवयायां यंकय्या लागि गां गामय् नगरया त्वाल्य त्वाल्य मदिकक ज्या इवः न्ह्याक चवंगु खौं ब्याक दिल ।



ज्या इवःसं नपली सिर्जनानगर प्रहरी टोल समितिया कजि नपां नगर सभासद सुर्य प्रसाद श्रेष्ठ नं न्वचु बियो द्युगु खः । औपचारिक ज्या इवः लिपा नेकगू चरणया ज्या इवः प्र.नि. सुर्य बहादुर शाही जुं लैङ्गिक हिंसा विरुद्ध कानुनी साक्षरताया विषय प्रस्तुतीकरण याडः दिल ।

कःसि खेतीया तालिम

खप नगरपालिका वडा नं. ४ या ग्वसालय जूगु कःसि खेतीया तालिम बवचाल । उगु तालिमय बवति कायो द्युपुं सकल सहभागीपिन्ता खप नगरपालिकाया उप-प्रमुख रजनी जोशीजुं दसि पौ लः लहाडः दिल । खप नगरपालिकां थी थी वडाय् लाहातय् ज्या दैगु सीपमूलक व व्यवहार उपयोगी तालिमत न्ह्याक वयो चवंगु दः । गुकिं देया ल्यासे-ल्याम्हो पुं विदेशय् वानय् स्वायकः थःगु हे देशय् सं ज्या याडः नय् फौगु उद्देश्यं नगरपालिकां तालिम ब्यु ब्यु वयो चवंगु खः ।



कःसि खेती न्हंगु विकल्प काथं काय्फः

खवप नगरपालिका वडा नं. १ या ग्वसालय फागुन १४ गते निसैं १६ गते तक जूगु कःसि खेती तालिम आइतबार क्वचाल । उगु ज्या इवःसं खवप नगरपालिकाया प्रमुख सुनिल प्रजापति जुं तालिम कःपुं नीछम्हा प्रशिक्षार्थीपिन्ता दसिपौ लः ल्हाडः दिल ।

ज्या इवःसं प्रमुख प्रजापति जुं खवप नगरपालिकां जीवन उपयोगी सीपमूलक तालिम ब्यू ब्यू वयो च्वंगु खाँ ब्याकसे बूँ याय्ता जग्गा मदयो वसेलीं कःसि खेती छगू न्हंगु विकल्प काथं काय् फः धाय्गु खाँ ब्याक दिल ।

कःसि खेती खय् पिङ्गु अनेक तरकारी, फलफूल बालि खं चाकलीया लकस वाउँङ्गु नपां फोहर मुड सः दयूक तय दैगुलिं ब्यवस्थापन याय्ता नं अःपुङ्गु नपां न्हंगु पुस्ताता बूँज्या व अन्न सय्केगु तालिम थें जुङ्गु व छुं नं सिमा-स्वमा वा तरकारी पिय बले उकिया जीवन चक्र नं थुङ्कय् विय दैगु लिं कःसि खेती याय्मः धायोदिल ।

कृषिया बारेया प्राविधिक ज्ञान वैज्ञानिक ढङ्गं बूँज्या याय्ता ग्वाहाली जुङ्गु खाँ ब्याकसे वयकलं थः कय् दःगु सैद्धान्तिक व ब्यवहारिक ज्ञानता नं नपां-नपां यंकय्मः धायोदिल ।

ज्या इवःसं खवप नगरपालिका वडा नं. १ या वडाध्यक्ष श्याम कृष्ण खत्री जुं खवप नगरपालिकां न्ह्याक वयो च्वंगु लाहातय् ज्या दैगु सीपमूलक तालिम व निःशुल्क स्वास्थ्य शिविरया खाँ ब्याकसे तालिमं थमनं सयकागु ज्ञान व सीपता छ्यो छ्यो



यंकमः धायोदिल ।

कःसि खेती तालिमया प्रशिक्षक सविन ख्याजुं हःनय् लाथें कःसि खेती याःसा कःसिं नाः ज्वङ्गु, छँ भार अपः जुयो थाय् थासय् तज्याडः वैगु समस्या वयफःगुलि सचेत यासे प्राविधिक पिनिगु सल्लाहखय् जक कःसि खेती याय्गु उपयुक्त जुङ्गु सल्लाह बियो दिल ।

ज्या इवःसं खवप नगरपालिका वडा नं. १ कृषि समितिया कजि पुण्यराम बाइजु, समितिया दुजः कृष्ण बहादुर दुगुजु, प्रशिक्षार्थी पाखं सीता पोखरेल, निर्मला श्रेष्ठ, नारायण थापापिसं तालिमया उपयोगिताबारे काडः दिल ।

बक्सिडः कासामिपिन्ता ट्रयाक सुट

खवप नगरपालिका प्रमुख सुनिल प्रजापति जुं नागार्जुन बक्सिडः खेलकुद विकास समितिया ग्वसालय फागुन १९ गते निसैं २२ गते तक जुङ्गु 'वीर गणेशमान सिंह बागमती प्रदेश स्तरीय बक्सिडः धिं धिं बल्ला कासा' या खवप नगरपालिका पाखं ब्वतिकाइपुं कासामिपिन्ता फागुन १७ गते ट्रयाकसुट इडः बिल ।

कासामिपिन्ता निर्देशन ब्यूसे प्रमुख प्रजापतिजुं कासामिपुं ग्याडः मखु आत्मविश्वास बलाकः अनुशासित ढङ्गं कासाखय् दुतिनय् मःगुलि बः ब्यूसे छुं नं कासा त्या बुखं मनूतय्ता ज्ञान



विङ्गु खाँ काडः दिल ।

खवप नगरता कासामिपिनिगु नगरकाथं म्हासिडका पिठवयता व नगरबासी ल्यासे ल्याम्होपिन्ता (सक्रिय व क्रियाशील) त्वमतय्कसिं कासाखय् लगय् जुङ्क तय्ता दाँय दाँय पतिकं अन्तर नगर धिं धिं बल्ला कासा याडः वयो च्वंडागु व थी थी कासाया प्रशिक्षण (स्यनय् ज्या) नपां धिं धिं बल्ला कासा नं याडः वयो च्वंगु खाँ प्रमुख प्रजापति जुं ब्याक दिल ।

थ्वहे इवल्य युवा तथा खेलकुद समितिया कजि श्याम कृष्ण खत्रीजुं नगरपालिकां खुताजि कासाया मदिकक प्रशिक्षण ब्यू ब्यू वयो च्वंगु व खवप नगरपालिकाया ग्वसालय् फागुन २९ निसैं चैत्र ३ तक जुङ्गु (अन्तर) नगरब्यागु चेतया धिं धिं बल्ला जुङ्गु जानकारी बियो दिल । नपां कासामिपिसं अनुशासित जुयो कासा म्हेतःदियता इनाप याडः दिल ।

प्रमुख प्रजापतिजुं उगु धिं धिं बल्ला कासाखय् ब्वति कायो द्यूपुं न्हय्म्हा बक्सिडःया कासामिपिन्ता खवप नगरपालिकाया ट्रयाकसुट इडः दिल ।

प्रमुख प्रजापति जु नपां सुवास भण्डारी नेपालःभाल

ख्वप नगरपालिकाया प्रमुख सुनिल प्रजापति नपां फागुन १८ गते संस्थागत विद्यालय अभिभावक संघया केन्द्रीय नायो सुवास भण्डारी व सौन्दर्य कला व्यवसायी संघया नकी कमला श्रेष्ठया न्हयलुवाय प्रतिनिधिमण्डलपुं नेपालः भाल । नपालाय्गु इवल्य वयकपिसं पाठ्यक्रमख्य 'सौन्दर्यकला' विषय नं दुथ्याक्य दःसा जिइधाय्गु खाँ तयो दिल ।



नेपालाय्गु इवल्य नगर प्रमुख प्रजापति जुं छुं नं ज्या तहां-चिच्याहां धाय्गु मदैगु खाँ ब्याकसे ज्या याडः नय्गु मति

तयो ज्या याता सम्मान याय् सय्के मः धायोदिसे ख्वप नगरपालिकां ख्वपया ल्यासे ल्याम्होपिन्ता लाहातय् ज्या दैगु थी थी सीप मूलक व जीवन उपयोगी तालिमत बियो वयो च्वंगु नपां ख्वप नगरपालिकापाखं न्ह्याक च्वंगु कलेजं प्राविधिक विषयता हछ्याड ब्वंकय्गु याडः वयो च्वंगु अलय् ख्वप नगरपालिकां हे स्थानीय पाठ्यक्रम लागु याडः ब्वंकय् ब्युगु नेपःयाय् हे न्हापांगु स्थानीय तह खः धायोदिसे वयकलं नेपःया लागिं प्राविधिक विषयया महत्व अपलं दः धायोदिल ।

नेपालाय्गु इवल्य अभिभावक संघया नायो भण्डारी जुं विद्यालय तगिख्य निसें हे लाहातय् ज्या दैगु सीपमूलक तालिम ब्यु ब्यु वानय् मःगु नपां ज्यायाता सम्मान याय्गु खाँ स्यँ स्यँ वानय् मः धायोदिल ।

अथेहे सौन्दर्यकला व्यवसायी संघया नकिं कमला श्रेष्ठ जुं सौन्दर्यकला (समा याय्गु कला) नेपःया सरकारं केन्द्रीय विषय काथं गुगु व हिंगू तगिख्य स्वीकृति विय धुंकगुलिं थुकिता क्वयया पाठ्यक्रमय् नं दुथ्याकः, व्यवस्थित ढंगं ब्वंकय्गु व्यवस्था याडः थुगु पेशाता मर्यादित व सम्मानजक पेशा काथं विकास याय्ता नगरपालिकापाखं ग्वाहाली याइगु आशा प्वंकः दिल ।

वडा वडाय् सामाजिक सुरक्षा भत्ता इतः

फागुन १९

आ.व. २०७७/७८ या सामाजिक सुरक्षा भत्ता अन्तर्गत नेकगु प्यलाया छक विइगु चौमासिक (मंसिर-फागुन) भत्ता व आर्थिक सहायताया धेबा सम्बन्धित वडा पाखें न्हिल्या २०७७ फागुन १९ गते निसें इड च्वंगु दः । १९ गते वडा नं. १ क्य ३२ लाख व न्हय्द्व व नेस, वडा नं. २ ख्य २९ लाख व डय्खुद्व, वडा नं. ३ ख्य ३२ लाख व डय्द्व, ४ वडाय् ६४ लाख व हिन्यद्व व नेस, ५ वडाय् ४० लाख तका दां, ६ वडाय् ३७ लाख व स्वीद्व व प्यस, ७ वडाय् ४१ लाख, व डय्द्व, ८ वडाय् १९ लाख व नीडाद्व व च्यास याडः मुक्क ३ करोड न्हय्खुगु लाख व गुइप्यद्व व खुस तका धेबा इय धुकल । सामाजिक सुरक्षा व आर्थिक सहायता इयगु ज्या फागुन २१ गते तक जुइगु खाँ नगरपालिका स्रोतं जानकारी ब्युगु दः ।

२० फागुन

ख्वप नगरपालिकां थाकालिपुं जेष्ठ नागरिक व सामाजिक



सुरक्षा भत्ता इयगु ज्या बुद्धबार निसें सुरु यागु खः । कार्यालय वयो भत्ता कः भ्नाय् मफूपुं थाकालिपुं जेष्ठ नागरिक पिन्ता छँ छँ वाडः ख्वप नगरपालिकाया जनप्रतिनिधिपिसं सामाजिक सुरक्षा भत्ता इड बियो च्वंगु दः ।

गुठी संस्थानया भवन मौलिक शैलीं हे दय्किगु

ख्वप नगरपालिका प्रमुख सुनिल प्रजापति जुया नायोसुई ख्वप नगरपालिकाया ५ वडाय् लागु गुठी संस्थान कार्यालयया भवन दानय्या लागिं तयार याड तःगु नक्साया विषय फागुन १९ गते स्वापु दःपुं सरोकारवालापुं च्वडः छगू बैठक जुल ।

बैठकं लायकुली च्वंगु गुठी संस्थान ख्वपया कि.नं. ७५४ या क्षेत्रफल ०-८-३-० दःगु जग्गाया नक्सा पिब्वसेलिं उगु नक्साया विषय साविक काथं स्मारक संरक्षण जुइगु स्मारक शैली व स्वरूप काथं नक्सा पास प्रक्रियाया लागिं हज्याकय्गु निर्णय जुल ।



पुरातत्व विभागं ३५ फूट स्वयो तः जाय्क दानय् मरुगु तर्क यासे साविक भवनय् दःगु देगःया थ्यं मथ्यं छता म्हवें याडः नक्सा स्वीकृत यासेलिं नगरपालिकां उकिता अस्वीकार यायां वयो च्वंगु खः । प्राचीन स्मारक संरक्षण ऐन २०१३ काथं सम्पदाय् निजी छँ थें उचाइ मापदण्ड कायम जुय मफैगु धायोदिसे नगरपालिकाया पटक-पटक उगु नक्सा साविक बमोजिम परिमार्जन याडःह्यता पुरातत्व विभागय् छ्वगु खः । अथेन पुरातत्व विभागं

ल्वनय्गु खॉ मानय् मयासेलिं नगरपालिकाया न्हयलुवाय् बैठक च्वडः भीगु थःगु हे मौलिक शैलीं साविक बमोजिमया नक्सा पास याय्ता फुक्क स्वापु दःपुं सरोकारवालापुं सहमत जूगु खः ।

बैठकय् न्वचु तयो दिसे नगर प्रमुख प्रजापति जुं ख्वप दे ऐतिहासिक व सांस्कृतिक महत्व कः घाड च्वंगु सहर जुगुलिं थानाया सम्पदात दानय्-कानय् व ल्वनय्गु ज्या तस्कं संवेदनशील विषय जूगुलिं लुयो वगु ऐतिहासिक प्रमाण व तथ्यया लिधंसाय् गुठी संस्थान कार्यालयया भवन दानय् मःगुलि बः बियो दिल । ख्वप नगरपालिकां थानाया सम्पदात ल्वनय् कानय् याय्गु ज्याख्य थानाया जनताया राय-सुभाब व जनताया सहभागिता ख्य हछ्याड च्वडागु खॉ काड दिल ।

स्मारक संरक्षण व दरवार हेरचाह केन्द्र ख्वपया प्रमुख अरुण नकःमि जुं गुठी संस्थानया भवन स्मारक खः, निजी छँ मखु धायोदिसे लाय्कु लागाय् सिलु महादेवया देगः दय्क च्वंगु दः, व नं स्मारक खः । स्मारकया उचाइ म्हँव याय्गु ज्या उपयुक्त मजु । पुरातत्व विभागय् स्पष्ट यासे प्रस्तावित नक्सा पासया ज्या हछ्याय्गु सहमत याड दिल ।

बैठकय् नगरपालिकाया उप प्रमुख रजनी जोशी, प्रमुख प्रशासकीय अधिकृत राम लाल श्रेष्ठ, वडा नं. ७ या वडाध्यक्ष उकेश कवां, गुठी संस्थान कार्यालयया प्रमुख आनन्द प्रसाद कर्माचार्य, जिल्ला प्रशासन कार्यालय व महानगरीय प्रहरी परिसर भक्तपुरया प्रतिनिधि, प्रशासकीय अधिकृत दामोदर सुवाल, ख्वप नगरपालिका सम्पदा शाखा, नक्सा शाखा व योजना शाखाया प्रमुखपिसं लुयो वगु ऐतिहासिक प्रमाणया लिधंसाय गुठी संस्थान कार्यालयया भवन दानय्मः धायो दिल ।

फसी देगः ल्वनय्गु ज्या न्ह्याक च्वंगु

फागुन १९

स्वप नगरपालिकाया प्रमुख सुनिल प्रजापति जुं स्वपया लायकुली च्वंगु फसीदेगः/सिलु महाद्योया देगः ल्वड च्वंथाय् भायो स्वयो दिल । २०७२ सालया तः भस्वाचां थुड ल्युगु उगु देगः पुलांगु मौलिक पहलय् दय्क च्वंगु खः ।



कोरोना खोपया अभिमुखीकरण

भक्तपुर नगर खोप समन्वय समितिया ग्वसालय् कोभिड १९ विरुद्धया खोप सम्बन्धी अभिमुखीकरण ज्याइवः मंगलबार जुल ।



ज्या इवःसं नगर खोप समन्वय समितिया कजि नपां नगर प्रमुख सुनिल प्रजापति जुं नेपाल सरकारया आधिकारिकता दःगु कोभिड सिल्ड खोप अभियानता जनप्रतिनिधिपिन्ता जनताया छँ छँ वानय्गु नपां जनताता सचेत याय्गु मौका काथं छ्यलय् मः

धायो दिल । वयकलं खोप अभियानता जनताया दथ्वी वाड जनताप्रति समर्पित जुयो सेवा याय्गु अवसर खः दक थुइकः कोभिड १९ छुंमखु दक थुइक च्वंगु भ्रमपाखं जनताता सचेत याडः कोरोना भाइरस विरुद्धया खोप काय्गु खाडः ग्याडः च्वंपु अपलं दःगुलिं जनताता थुइकय् बियो थःगु स्व- इच्छां खोप काय्केता प्रेरित याय्ता बः बियो दिल ।

न्हेंगु पहया कोरोना भाइरस प्याहाँ वयो च्वंगु अःया इलय् नेपालय नं सक्रिय संक्रमितपुं अपलं दयो वय फैंगुलिं सकलिं सचेत जुयमः दक प्रमुख प्रजापति जुं धायोदिल ।

ज्या इवःसं स्वास्थ्य कार्यालयया प्रमुख कृष्ण बहादुर मिजार जुं अभिमुखीकरण ज्या इवः न्ह्याकय् मःगुया उद्देश्य काडः दिसे कोभिड १९ ल्वयया परिचय खोप छायाकाय् मःगु, थुगु ल्वय् जूगु गथे सिइकेगु ? थुकिं मथिइकः मपुंकः गथे जुयगु ? थी थी खाँत प्रस्तुतीकरण क्यडः दिल ।

जनस्वास्थ्य सेवा केन्द्र ख्वपया प्रमुख डा. रत्न सुन्दर लासिवा जुं न्ह्याकः द्यगु उगु ज्या इवःसं ख्वप नगरपालिकाया जनप्रतिनिधि पुं, प्रमुख स्वास्थ्य संस्थाया प्रतिनिधिपुं नं भःगु खः ।

कोरोना खोपया सचेतना ज्या इवः

फागुन २०

वडा नं ४ या बोलाछँ तँचाया तारा महिला स्वयम सेवक समितिया ग्वसालय जूगु कोरोना भ्याक्सिनया सचेतना ज्या इवःसं जनस्वास्थ्य केन्द्र च्याम्हासिंहया प्रमुख नपां डा. रत्नसुन्दर लासिवा जूं यूरोपय् न्हेंगु लक्षणया भाइरस प्याहाँ वगुया कारणं लकडाउन जुयो च्वंगु खाँ ब्याकसे कोभिड १९ भ्वल्वचं मपुंकः मथिइकः म्वाय्गु जूसा कोरोनाया खोप मकःसि. मगा धायोदिल ।

वयकलं मेमेगु ल्वय्या खोप थें कोरोनाया खोप नं मकः सिं मगा धायोदिसे थुगु खोप काय्धुंकः वाकवाक वइगु, कपः स्याइगु, ज्वरो वइगु, म्हाछिं स्याइगु थजगु छुं भाति सामान्य शारीरिक समस्या जुइगु सम्भावना दःसां छन्हू नेन्हू लिपा अथें हे मदयो वानि धायोदिल ।

डा. लासिवां फागुन २३ गते लिपा ६५ दा च्वय् याय्पुं जेष्ठ नागरिकपिन्ता खोपय् याकयगु ज्या इवःदःगु हिन्हू लिपा ५५ दा च्वयया नागरिक पिन्ता खोपय् याकिगु ज्या इवः दःगु खाँ ब्याकसे प्वाथय् दःपुं मिसात, तः तः हांगु गम्भीर ल्वय दःपुं मनूत, क्यान्सर (उखुम), मृगौला व चिनी ल्वय दःपुं व हिंच्यादा क्वय



याय्पिसं उगु खोप काय् मज्य धायो च्वंगु खाँ नं ब्याक दिल ।

नेपाल मजदुर किसान पार्टी भक्तपुर नगर समितिया उपेन्द्र सुवाल जुं तारा स्वयम सेवक समूह पाखं लकडाउनया इलय कोरोना महामारी मथिइकः जुयता अलय कोरोना डाडः पुडः मवांकय्ता त्वालय् त्वालय् (चुन) स्वाखः, क्लोरिन, ह्वलय्गु स्यानिटाइजर दय्केगु तालिम ब्यूगु खाँ ब्याकः दिल ।

ज्या इवःसं कृष्ण गोविन्द दुवाल, प्रेमलक्ष्मी त्वायना व रामलक्ष्मी दुवालं पिसं नं न्वचु तयो द्यगु खः ।

मिखाया शिविर

ख्वप नगरपालिका वडा नं. १० समितिया ग्वसालय फागुन २२ गते मिखाया शिविर जुल । उगु शिविरया उलेज्या ख्वप नगरपालिकाया उप-प्रमुख रजनी जोशी जुं याड दिल् ।

ज्या इवः सं उप प्रमुख जोशी जुं जनताया स्वास्थ्य व शिक्षाख्य ध्यान तयो ख्वप अस्पताल व जनस्वास्थ्य केन्द्रे मदिकक सेवा बियो वयो च्वंगु खाँ काड दिसे ख्वप नगरपालिकापाखं न्ह्याक च्वंगु ख्वप कलेज व इञ्जिनियरिड कलेजय् ६४ गू जिल्लाया ब्वनामिपुं ब्वड वयो च्वंगु खाँ ब्याक दिल् । १० नं वडाया वडाध्यक्ष लक्ष्मीप्रसाद ह्योमिखाया सभानायोलय् सुरु जूगु ज्या इवःसं पूर्व वडाध्यक्ष चन्द्र बहादुर उलक, डा. धिरज अधिकारी व वडा सचिव गोविन्द राम थुसां नं न्वचु तयो द्यूगु खः । शिविरय् १६९ म्हा मनूया मिखा जाँचय् यागुली २७ म्हा सिता मोतिविन्दुया शल्यक्रिया याई ।



स्वास्थ्य शिविर



नेपाल क्रान्तिकारी महिला संघ ९ वडा समितिया ग्वसालय फागुन २२ गते खुन्हं स्थानीय वाकुपति नारायणोया हनयँ छगु तहांगु स्वास्थ्य शिविर जुल । स्वास्थ्य शिविरया उलेज्या जन स्वास्थ्य सेवा केन्द्रया इन्चार्ज डा. रत्न सुन्दर लासिवाजुं याड द्यूगु खः । वयकलं स्वस्थ जुयता नसा त्वसा खय् बिचः याय् मःगु व शारीरिक ब्यायाम याय् मःधायोदिल् ।

नेपाल मजदुर किसान पार्टी सूर्यमढी समितिया प्रतिनिधि काशिलाल प्रजापति जुं न्हूँ न्हूँगु स्वास्थ्य समस्या खानय् दयो वगुलिं अपलं समस्या जुयो वगुता म्हवँ याय्ता इलय् हे स्वास्थ्य परीक्षण याय्मः धायोदिल् । ग्वसाखलया नकी रामेश्वरी कोज्यूया सभानकीलय् जूगु उगु ज्याइवःसं समितिया दुजः तीर्थ लक्ष्मी धन्छा नं न्वचु तयो द्यूगु खः । उच्च रक्तचाप, चिनी ल्वय, नाइनया जाँच यागु उगु शिविरय् १०५ म्हा सिनं जाँचय् याकगु उगु रिपोर्ट बुधवार छगु कार्यक्रम याड इड बियगु खाँ ग्वसा खलं धःगु दः ।

इगाप

ख्वप नगरपालिका पाखं पिथाड च्वंगु ख्वप पौ बः छि पौ खय् बांलागु चवसु त बियो ग्वाहाली याड दिसे । उगु रचनाया ल्यः ज्या याड पारिश्रमिक बियगु खाँ ख्वप नगरपालिकाया २०७७ श्रावण २६ गते च्वंगु बैठकं क्वः छ्यूगु खाँ ब्याक चवडा ।

सम्पादक
ख्वप पौ

स्थानीयया न्ह्यलुवाय् त्वनय्गु नाः वितरण

ख्वप नगरपालिकाया नगरस्तरीय बजेट पाखं द्यक् च्वंगु त्वनय्गु नाः या ट्याडकी व फिल्टर जडान योजनापाखं फागुन २२ गते त्वनय्गु नाःइड ब्यूगु खः ।

योजनाया उलेज्या याड दिसे ख्वप नगरपालिकाया प्रमुख सुनिल प्रजापति जुं त्वनय्गु नाः अःपुक इड बियता नगरया थी थी थासय् डीप बोरिड याड च्वंगु खाँ काड दिल ।



प्रमुख प्रजापति जुं नाः छँ (स्रोत) व मुहान ल्यंकः तय्ता प्रकृतिया संरक्षण मयासें मगागु खाँ ब्याकसे ख्वप नगरपालिकां शिक्षा, स्वास्थ्य व सुचुकुचु खय्जक मखु नगरबासीपिन्ता लाहातय ज्यादैगु सीपमूलक तालिमत बियो वयो च्वंगु खाँ ब्याकदिल ।

ख्वप नगरपालिका वडा नं. ७ या वडाध्यक्ष उकेश कवां जुं ख्वपय् लिच्छवीकालनिसें हे त्वनय्गु नाः या समस्या ज्यंकय्ता

थी थी थासय राजकुलो, ल्वहँहिति, तुंथि, पुखु, ब्वडचा नपां नाःया मुहानयाता बचेयाड तःगु खाँ ब्याकसे विज्ञान व प्रविधिया विकासया कारणं जमिन तलय्या नाः थाकायो त्वनय्जिडक छ्यलय् फःगु खःधायोदिल ।

ख्वप नगरपालिका खानेपानी समितिया कजि नपां ख्वप नगरपालिका वडा नं. ८ या वडाध्यक्ष महेन्द्र खायमली जुं ख्वपय् त्वनय्गु नाः इयगु ज्या ब्यवस्थित याय्ता त्वनय्गु नाःया पाइपलाइन ल्हवड, भिक वयो च्वंगु खाँ ब्याकसे त्वनय्गु नाःया समस्या ज्यंकय्ता नगरपालिकां कृतःयाडः च्वंगु खाँ काड दिल ।

त्वनय्गु नाःया ट्याडःकी निर्माण उपभोक्ता समितिया नायो बलराम गोसाईया सभानायोलय् क्वचगु उगु ज्या भ्वःसं वडाया दुजः रञ्जना त्वाती, नेमकिपा इनाचो एकाइ समितिया कजि कृष्ण गोविन्द लाखाजु, आदर्श आजाद कलेजया प्राचार्य श्रीकृष्ण किसी, समाजसेवी लक्ष्मीभक्त कवां, पूर्व वडाध्यक्ष कृष्णगोविन्द खाइजु, अनुगमन समितिया छ्याञ्जे राकेश सुकुपायो, दुजः भुवन गोसाई पिसं नं थःथःगु बिचः प्वंकः द्यगु खः ।

उलेज्या यागु त्वनय्गु नाः ट्याडकी व फिल्टर जडान योजनाया मूकं खर्च ७० लाख डय्प्यट्ट व नेस व पीगुर्का दां खर्च जगु उपभोक्ता समितिं जानकारी ब्यूगु खः ।

‘भक्तपुर लय् पौ’ या अन्तरक्रिया

ख्वप नगरपालिका वडा नं. ३ या गवसालय् ख्वप नगरपालिका पाखं पिकायो च्वंगु ‘भक्तपुर लय् पौ’ या अन्तरक्रिया फागुन २२ गते स्थानीय शिक्षक व बुद्धिजीवी पिनि दशवी जुल ।

ज्या इवःसं मू पाहाँ ख्वप नगरपालिकाया प्रमुख सुनिल प्रजापति जुं ख्वप नगरपालिकां नगरपालिकाया ज्या इवः न्ह्यकनय् स्वयथे पारदर्शी याड जनताया हःनय् पिब्वयगु व बौद्धिक खुराकया काथं ‘भक्तपुर लय् पौ’ मदिकक पिकाय्ता बः बियो वयागु खाँ ब्याक दिल ।

वयकलं ख्वप दे सांस्कृतिक व ऐतिहासिक महत्व कः घाड धस्वाड च्वंगु ख्वप दे जगुलिं नगरपालिकाया पिथना खय् ख्वपया संस्कृति, राष्ट्रिय अन्तरराष्ट्रिय च्वसुत दुथ्याक समाजता खःगु लौपुइ यंकय्ता भक्तपुर लय् पौ खं बांलागु ज्या याड च्वंगु खाँ ब्याक दिल ।

वयकलं लय् पौ खय् पिथांगु च्वसुया विषय पाठक पिनिगु रचनात्मक आलोचना व सुभावा बियो दियता अनुरोध यासे संस्कृतिया विकासया निंतिं थी थी साफूतय्गु अन्तरक्रिया याय्मः धायोदिल ।

वयकलं लय् पौ खय् पिथांगु च्वसुया विषय पाठक पिनिगु

रचनात्मक आलोचना व सुभावा बियो दियता अनुरोध यासे संस्कृतिया विकासया निंतिं थी थी साफूतय्गु अन्तरक्रिया याय्मः धायोदिल ।

ज्या इवःसं ख्वप नगरपालिका वडा नं. ३ या वडाध्यक्ष राजकृष्ण गोरा जुं वडाया विकास निर्माणया ज्या इवःत न्ह्यब्वयो दिसे ख्वप नगरपालिकाया ज्या इवःनपां विचः लं च्वजःगु भक्तपुर लय् पौ त्वः मफिडक ब्वनय्ता बःयाड दिल ।

ज्या इवःसं कार्यपालिकाया दुजः सुनिता अवाल जुं कोभिड १९ या भ्वल्वयया दशवी नं ख्वप नगरपालिकाया लय्पौ भक्तपुर व बःछि पौ ख्वप पौ मदिकक पिथाड जनताता सचेत व संगठित याय्गु ज्या याडवगु खाँ ब्याक दिल ।

ज्या इवःसं स्थानीय बुद्धिजीवीपुं महेन्द्र प्रसाद मास्के, सिद्धिरत्न शाक्य, चन्द्र भक्त भुजु, रमेश त्वायना, तुल्लिराम धुव्वा, राजु अवाल व अनिल न्यौपाने जुं भक्तपुर लय्पौया बारे थः थः उगु विचः प्वंकः द्यगु खः ।

उगु ज्या इवःसं वडा नं ३ या वडा सदस्य कृष्ण गोपाल चौगुठी नं न्वचु तयो द्यगु खः ।

श्रमिक महिला दिवसया प्रवचन ज्या इवः

फागुन २४

१९९ औ अन्तर्राष्ट्रिय श्रमिक महिला दिवसया लसताय खप नगरपालिका पाखं न्ह्याक च्वंगु शैक्षिक संस्थानतय्गु ग्वसालय् ब्वनामिपिनि दश्वी 'बलात्कारीता मृत्युदण्ड विय मःला कि म्वः' धाय्गु विषयसं जूगु वादविवाद धिं धिं बल्ला कासा ज्या साड च्वंगु महिला शिक्षक कर्मचारीपिनि दश्वी छ्येँ बल, ब्वाक वानय्गु कासा, सटपुट, उडबलया धिं धिं बल्ला कासा व प्रवचन ज्या इवः खप मा.वि./कलेज प्राङ्गणय् जूल । उगु ज्या इवःसं नेपाल मजदुर किसानपाटीया नायो नारायणमान बिजुक्छेँ जुं अन्तर्राष्ट्रिय महिला आन्दोलन नं मजदुर आन्दोलनया छब्व खः धायोदिला वयकलं शोषक वर्ग कामदार जनताया शत्रु जुइगुलिं सकल ज्या साड नैपुं कामदारत छप्पा छुधि जुयो ल्वाय् मः धायोदिसे महिला हिंसा व शोषण अप्वयो वांगुया दोष ब्यक्ति स्वयो अपः राज्याता वियमः धायोदिसे महिला सत्ताय् वा च्वय् च्वयया पदय् थ्यनय् वं त्हांगु ह्युपा वैगु मखु बरु अमिसं सुयाय्गु पक्ष ज्या साना व महत्वपूर्ण खौं खः धायोदिल ।



वयकलं जघन्य अपराधीत, देशया गोप्य खौं ज्वयकिपुं देशद्रोहीपिन्ता संविधान संशोधन याड जूसां मृत्युदण्ड बियमः धायोदिसे कुलतय् लापिसं हत्या, बलात्कार याइगुलिं अजपुं मन्तयता नियन्त्रणय् याय्ता कडा कानून दय्केमः अलय् सत्ताय् वांगु पार्टीया मन्तयसं अपराधीतयता कःघाड तैगुलिं अमिसं मग्यासिं अपराध याइगुलिं जघन्य अपराधया अपराधीपिन्ता ज्यान सजाय बियमः धायोदिल ।

वयकलं न्ह्यागु नं विषय सुक्ष्मढंगं स्वय मः धायोदिसे बेलायतया क्रान्ति गौरवमय क्रान्तिमखुसँ पुँजीपति व सामन्तत मिलय् जुयो मजदुर वर्गता न्ह्यो छ्वगु खौं कुलदिल । उकिं

अपराध म्हवँ याय्ता शिक्षण संस्था व विश्वविद्यालयं बांलाक ज्या सानय् फःधायो दिल ।

खप नगरपालिकाया प्रमुख नपां खप कलेजया सञ्चालक समितिया नायो सुनिल प्रजापति जुं सामन्तवादी व पुँजीवादी बिचः याय्पुं मन् तय्सं मिसातय्ता लबः या नितिं छ्यलिगु खौं ब्याकसे वर्ग दः तलय् समाजवाद मवतलय् महिला शोषण दयोंतुं च्वनिगु खौं काड दिल । वयकलं छगू छगू स्थानीय निकायं छगू छगू वडाय् शिशु स्याहार केन्द्रया ब्यवस्था यासा मचातय्गु चाकली विकास नपां दलदलमिसातय्ता ज्या दैगु खौं ब्याकसे मिसामस्त राजनीतिक रुपं सचेत व सङ्गठित जुयमःगु नत्र खौं जक ल्हाडां महिला मुक्ति मजुइगु लिं खप नगरपालिकां ब्यवहारं ज्या याड क्यडागु खौं काड दिल ।

अथेहे वागमती प्रदेशया सांसद सृजना सैजुं ८ मार्च महिला तय्गु श्रमिक महिला दिवस जक मखुसँ सकल ज्यासाड नैपुं ज्यापु ज्यामिया दिवस खः धायो दिसे पुँजीवादी ब्यवस्थाय् महिला मुक्ति जुय मफैगुलिं मिसामस्त राजनैतिक संघर्ष खं जक मुक्ति दैगु खौं काड दिल ।

ज्या इवःया सभाया नकिं नपां खप नगरपालिकाया उप-प्रमुख रजनी जोशी जुं १९९ औ अन्तर्राष्ट्रिय श्रमिक महिला दिवस डाय्कः च्वंबलय् अपलं ज्या साडः नैपुं श्रमिक वर्गया मिसात आखः ब्वनय् मखाड च्वंगु खौं ब्याकसे खप नगरपालिकां शिक्षाता हःनय् तयो ज्या साड च्वंगु खौं ब्याकसे 'थिड्क ग्लोबली-एक्ट लोकली' धथे याड च्वंडागु खौं ब्याक दिल ।

महानगरीय प्रहरी परिसर भक्तपुरया प्रमुख तारादेवी थापा जुं नेम्हा प्यम्हा अपराधीतयसं याड मन् सर्वश्रेष्ठ प्राणी धाय्ता थाकुयो वगु खौं ब्याकसे हलिमय निरक्षर व अशिक्षित जनसंख्या मध्ये दुईतिहाइ महिला त खः धायोदिसे महिला हिंसाया घटना मध्ये ५५ प्रतिशत स्वयो अपः थः छेँ जहान, थःथिति पाखं जुयो च्वंगु खौं ब्याकसे प्रहरी नपां सहकार्य यासा अपराधीत लुइकय् अःपुइधायोदिल ।

वाद विवादया लिच्च अधिवक्ता कानुन अध्ययन समाजया नायो राम प्रसाद प्रजापति जुं न्यंकगु खःसा खप कलेजया प्राचार्य रुपक जोशी, खप कलेज अफ इञ्जिनियरिड्या उप प्राचार्य रत्नशोभा प्रजापति, शिक्षिका सुस्मा सापकोटा व मिना महत पिसं न्वचु तयो द्यगु खः ।

दश्वी दश्वी चिनाखँ ब्वंगु उगु ज्याइवःलय् सिरपा लः ल्हाय्गु ज्या नं जूगु खः ।

नेमकिपा यँ जिल्ला सम्मेलन जुल

नेपाल मजदुर किसान पार्टी यँ जिल्ला समितिया खुकगु सम्मेलन नेपाल मजदुर किसान पार्टीया नायो नारायणमान बिजुक्छे जुं उलेज्या याड दिल् । फागुन २५ गते बालाजु नयाँ बजारय् जूगु उगु सम्मेलनसं नायो बिजुक्छे जुं न्हूगु पुस्ताता राजनीतिक रुपं सचेत व सङ्गठित याय्मः धायोदिसे सम्मेलनय् पार्टी नीति, कार्यक्रम व गतिविधिबारे अपलं छलफल याड, अः तक्या ज्याया समीक्षा याडः मचः मगागु व द्रंगु ज्या अः वैगु दिनय् मयासिं ल्हवड हज्याय्मःगु खाँ काड दिसे अः वैपुं न्हूगु न्ह्यलुवापुं छे त्वःत पार्टी विस्तार याय्गु ज्याख्य वानय् फःपुं पुँजीवादीपिनिगु करौडौ खर्चया विरुद्धय ल्वाय फःपुं जुयमः धायो दिल् । न्हूगु पुस्तां हलिमय जूगु बेलायती क्रान्ति, फ्रान्सेली क्रान्ति व अमेरिकी स्वतन्त्रता संग्राम व पेरिस कम्युनिष्ट शिक्षा कायो सास दःतलय् पुँजीवादी व्यवस्थाया विरुद्धय ल्वाय फय्के मः धायोदिसे नक्कली कम्युनिष्टत जक 'गना नय् दै आना थाय् व बिचः हिलः जुइ' दक धायोदिसे वर्ग शत्रुया हनय् कपः क्वछुकिपुं बिचःया अडान मरुपुं कम्युनिष्ट जुय फेमखु उकिं संघर्षयाता जीवन पद्धति काथं छ्यलः थःगु बिचलं मेपिन्ता सालः न्हूगु पुस्ताता कुलतं बचेयाड तयमफसा, विदेशय् छवत धःसा, राजनीतिक चेतनां तापाक बियो क्रान्तिता भन-भन लिधवाड छ्वैगु नपां अनेक जः याड लोभक्यडः गरिबया सम्पति लाक कायो ल्यासे ल्याम्होया जनशक्ति विदेशय् छवइगु ज्याखं सतर्क जुयमः धायोदिल् । पार्टीदुनय् पासापुं नपां छलफल याड ज्या याःसा गल्ती म्हवँ जुइगुलिं थजगु बानी बसय् याय्मःगु सल्लाह बियो दिल् ।

वयकलं आन्दोलनया इलय् गाडी छ्वय्किगुलिं विदेशी पुँजीपतित लय्ताइगुलिं नेमकिपां अथय् गुळ्ले मयागु अः सरकारय् वापुं शासक दलत विदेशी पुँजीया दलाल जुयो च्वंगु अपलं उदाहरणत दःगु खाँ ब्याक अमिगु विरुद्धय वर्ग संघर्षया भावना हाँगः निसे हे न्हूगु पुस्ताता सचेत यायां वानय्मः धायोदिल् ।

रूसी कम्युनिष्ट आन्दोलनया त्राटस्की व बुखारिन थें नेपालय् नं प्रचण्ड व बाबुरामपुं अथेहे खानय् दःगु खाँ ब्याकसे नायो बिजुक्छे जुं भारतता काथं छिं थें सरकार दय्केगु प्रचण्डया बिचः तहांगु देश भारत नपां चिच्याहांगु देश नेपालं निहँ खोजय् याय् मज्यगु बिचः प्वकिम्हा भट्टराइपुं भारतीय विस्तारवादया गुप्तचर जक मखुला ? थजपिसं भीगु हे भारतय् स्वाड छ्वय्मः दक धाय्ता नं लिफः स्वइमखु । उकिं जनता सचेत जुयमः धायो दिल् ।

वयकलं संसदीय व्यवस्थाय् प्रधानमन्त्रीकय् संसद विघटन याय् फेगु विशेषाधिकार दैगु खाँ लिफ्यसे सर्वोच्च अदालतं कानुनी मिखालं संसद पुनः स्थापना यासां राजनीतिक दृष्टिं संसद विघटन याडः न्हूगु जनादेशय् वानय्गु अपलं प्रजातन्त्रिक जुइगु व अः या संविधानया ७२ बूँदाख्य नेमकिपां असहमति प्वकागु खाँ नं काडः दिल् ।

भारतीय गुप्तचर विभागया प्रमुख व प्रधानमन्त्रीया दशवी छु छु विषय खाँ जुला व खाँ प्याहाँ मव तलय् वयागु सल्लाह हे

संसद पुनः स्थापना यागु खः धाय्गु न्ह्यसः दानिगु स्वाभाविक खः धायो दिसे वयकलं संसद पुनः स्थापनाया सडक आन्दोलनयँ एमसीसीया विरुद्ध नारा श्वयक बलय् प्रचण्डं पांगु अथेनं नारा श्वयो च्वंसेलिं प्रचण्ड थाय् हे त्वःत वांगुया अर्थ प्रचण्ड एम सी सीया पक्ष दः धाय्गु सिय् दः । अमेरिका व भारत छपु सुकाय् हाड च्वंपुं थौं या अवस्थाय् नेपःया लागि चुनौतिपूर्ण खः नायो बिजुक्छे जुं धायोदिल् ।

ज्या इवः सं पार्टीया केन्द्रीय दुजः नपां बागमती प्रदेशया दुजः सुरेन्द्र राज गोसाइँ जुं भी अग्रज पिसं ड्यदा-खुइदा हाँ निसं याड वयो च्वंगु कुतःपू वांकय्ता न्हूगु पुस्ताता राजनीतिक चेतना बियो हछ्याय्मः धायोदिल् ।



अथेहे बागमती प्रदेशया सांसद सजना सैजू अन्तरराष्ट्रिय श्रमिक नारी दिवसया महत्व कांसे वर्गीय मुक्ति बाहेकं महिला मुक्ति मजुइगु खाँ ब्याक दिल् ।

ज्या इवःसं नेमकिपाया थी थी जिल्लाया भक्तपुरया नायो न्हुछेभक्त फौजु, यलया नायो टीकाराम महर्जन, भौतया कृष्ण कुमार वैद्य पिसं नं भिन्तुना न्वचु तयो द्यगु खः ।

सोमबार क्वचगु नेमकिपा यँ जिल्ला समितिया बन्द सत्रसं नेमकिपाया छ्याञ्जे प्रेमसुवाल जुं प्रशिक्षण बियो द्यगु खः । उगु प्रशिक्षणय् वयकलं राजनीतिया अर्थ भिं ज्या याय्गु खः धायोदिसे सरकाय् वापुं पार्टी तय्सं जनताता ब्यगु बचं काथं ज्या मसांगु बेइमानी खः । राजनीति सानिपिसं सम्पति मखु संस्कारय् प्रतिष्ठा लुइकय्मः धायोदिसे राजनीतिक कार्यकर्ता तय्सं न्ह्याथिन्योगु पंगः नं हाचां गायो वानय्मः, त्याग दय्के मः धायोदिसे निर्वाचन अस्विकार यागु प्रतिगमन खः धायोदिल् । अः याय्पुं शासक दलत भारतमुखी जुयो वांगुलिं सचेत जुय मःगु, कार्यकर्ता तय्सं पार्टी प्रकाशनत ब्वडः थः व जनताता शिक्षित याय्मः धायोदिल् ।

पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं सर्वोच्च अदालतं देशया परिस्थितिता बिचः याडः फेसला याय्मः धायोदिसे अः परिस्थितिं सांसदत न्यायमिय याय्फःगु खाँ ब्याक दिल् ।

सम्मेलनया बन्द शत्र थी थी जनवर्गीय संगठनं प्रतिवेदन पेश यागु खः ।

(सिलु महाद्यो) फसिदेगः दानय्गु ज्याया निरीक्षणय् प्रमुख ज्यु
(२०७७ फागुन १९ गते)



बाराही स्थानया ताँ दय्क च्वंथाय् निरीक्षणय् प्रमुख ज्यु



गुठी संस्थानया भवन पुलांगु मौलिक पहलं दय्किगु

(२०७७ फागुन १९ गते)



अमिभावक संघया नायो भण्डारी व सौन्दर्य कलाया श्रेष्ठ

प्रमुख ज्यू नेपाल: काल

(२०७७ फागुन १८ गते)

